

ዔብሬ ዓሶም ዳኪንቴ ኪኢቶ ዓይያ ካር

ሃይ ኪኢታ ዔብሬ ዓሶም ፃኣፒንቴሢ ሚርጌ ዓሳ ዒዲ ማካያ ማዔም ፔኤኮ ጉሙርቂያ ሃሻኒ ዑኬ፥ ኪሪሰቶሴ ጉሙርቃ ዓሶምኬ፤ ሃኖ ኪኢቶ ፃኣፒ ዓሢ ምሲ ፔኦም ጎናሲ ፔጌና ዳዌሢ ዬሱሰ ኪሪሰቶሴና ማዒያ ዓማኔ ዔብሬ ዓሶም ዳዊ፥ ዔያታ ጉሙርቂያና ደዳንዳጉዲ ዔያቶ ዘራኔ፤ ዬያ ዒ ዘራ ዎደና ሃይሦ ጎኑም ባኣዚ ዔርዛኒ ኮዔኔ፤ ዬንሢያ፡-

1. ማታዴ ማቶ ዘሎና ምሲ፥ ዓዳሢም ጎኔና ዓይሢንታያ ማዔ ኪሪሰቶሴ ናንጊና ናንጋ ምሲ ናይኬ፤ ዒዚ ምሲ ናይ ማዒያና ሚናኣ ጫኣቃሢ ማፃኣፓ ዓኣ፥ ምሲ ማሊያ ኬኤዘ ዓሶይዳፓ፥ ምሲ ኪኢታንቸይዳፓ ሃሣ ሙሴይዳፓኣ ሚርጌና ባሻያኬ።

2. ዬሱሴ ሚናኣ ጫኣቃሢ ማፃኣፓይዳ ዓኣ ቁኤሳፓ ሚርጌና ባሻያ ናንጊና ናንጋ ቁኤሴ ማዒያ ምሲ ፔ ቶኦኪና ኬኤዘኬ።

3. ዬሱሴ ዘሎና ምሲ ጉሙርቃ ዓሲ ጎሚይዳፓ፥ ዓጊቹምና ሃይቢናይዳፓ ዳቃንዳኔ፤ ዬሱሴ ቁኤሶኮ ጉቤ ዑሢ ማዔሢር ዔብሬ ዓሶ ካኣዦ ዳምቦ ጎይያና ቆልሞ ሹኪ ዒንጊያ ዳቂንቶኮ ሺቢ ማዒ ዓኣያታንቴ ዒዘና ጎናዲ ዔርቴኔ፤ ጋዓያኬ።

ሃኖ ኪኢቶ ፃኣፒ ዓሢ ዒሰራዔኤሌ ዓሶ ዘሎ ኬኤዘንታ ሃይሶናኣ ዔያቶ ባኣካፓ ዔርቴ ዓሶኮ ጉሙርቂያ ኮኣከንሢ ማሢ (ዓይ. 11ይዳ) ናባባ ዓሳ ፔኤኮ ጉሙርቂያና ደዳንዳጉዲ ዘራኔ፤ ዬያጉዲ ሃሣ ዓይ. 12ይዳ ናባባ ዓሳ ዬሱሴ ኮሺ ዘጊ፥ ፔኤኮ ጉሙርቂያና ደዳንዳጉዲና ዎዚ ዔያቶ ማቶንታ ዎኣዪሢንታ ሄሌቴያ ጊቢ ዳንዳንዳጉዲ ዘራኔ፤ ጋፒንያይዳ ዘርና ላቲሢ ባኣዚና ኬኤዚ ጋፒሴኔ።

ማፃኣፔላ ዲማ ዲማ ዓርቄ ባኮ

- ዓይሢ ካራ ምሲ ፔኦም ኪሪሰቶሴና ፔጋሲ ዳዌሢ ዘሎ (1:1-3)
- ኪሪሰቶሴኮ ምሲ ኪኢታንቸይዳፓ ባሺ ማዒያ (1:4—2:18)
- ኪሪሰቶሴኮ ሙሴና ዒያሱናይዳፓ ባሺ ማዒያ (3:1—4:13)
- ኪሪሰቶሴኮ ቁኤሶይዳፓ ቢያ ዑሢ ማዒያ (4:14—7:28)
- ምሲ ፔ ዓሶና ጫኣቁ ጫኣቁማፓ ኪሪሰቶሴኮ ባሺ ማዒያ (8:1—9:28)
- ምሲም ሺኢሺ ዒንጎ ዒንጊያይዳፓ ኪሪሰቶሴኮ ባሺ ማዒያ (10:1-39)

ጉሙርቂያና ቤርታዳ ዓሶ ዛሎ (11:1—12:29)
 ያኦሲ ዋዛሲሢ ዛላ (13:1-19)
 ሺኢጲሢ ሺኢቆናያ (13:20-21)
 ጋፒንሢ ሃይሴ (13:22-25)

ያኦሲ ፔ ናዓሢ ዛሎና ኬኤዜሢ

1 ያኦሲ ሚና ዲማ ዲማ ጎይሢና፣ ፔ ማሊያ ኬኤዛ ዓሶ ዛሎና፣ ኑ ዓደንሢም ሚርጌ ዋዳ ኬኤዜኔ፤ 2 ሃሢ ጋዓንቴ ሃኖ ጋፒንያ ዋደና ቢያ ባኮ ዒዛም ዒ ማሄ፣ ፔ ናዓሢ ዛሎና ኑም ኬኤዜኔ፤ ዓጫ ቢያ ማዢንቴሢ ዒ ዛናኬ። 3 ዒዚ ያኦሲ ቦንቸኮ ማላታ ሃሃ ዒ ዛኮ ዓኣ ያኑማኣ ያኦሲና ዋላ ፔቴ ማዓያኬ፤ ጊንሢ ሃሃ ቢታንታ ዓኣ ቃኣሎና ሳያንታ ዓኣ ባኮ ቢያ ፔቴይዳ ዒ ዓርቂያኬ፤ ዓሶኮዋ ዒ ጎሞ ኬኤሹሰካፓ ጫሪንጮይዳ ዴኤፖ ያኑዛሢኮ ሚዛቆ ዛላ ዴዔኔ።

ያኦሲ ናዓሢኮ ኪኢታንቸይዳፓ ባሺ ማዒያ

4 ዒዛም ጌሢንቴ ሱንፃ ኪኢታንቸ ሱንፃይዳፓ ባሺ ማዔ ጎይያና ያኦሲኮ ናዓሢ ኪኢታንቸይዳፓ ቢያ ባሻያኬ። 5 ዋይቴ ጌዔቴ ያኦሲ ኪኢታንቸ ባኣካፓ፡-

«ኔኤኔ ታኣኮ ናዓሢኬ፤ ታ ኔኤኮ ሃኖ ዓደ ማዔኔ።»
 ሃሃ ጊንሢ፡-

«ታ ዒ ዛኮ ዓደ ማዓንዳኔ፤ ዒ ታኣኮ ናኣዚ ማዓንዳኔ»
 ጌዔይ ፔቴታዎ ባኣሴ። 6 ያኦሲ ፔኤኮ ቶይደ ናዓሢ ዓጫ ዳካኣና፡-

«ያኦሲ ኪኢታንቸ ቢያ ዒዛም ዚጎንጎ» ጌዔኔ።
 7 ኪኢታንቸ ዛሎ ጋዓንቴ፡-

«ኪኢታንቸ ዠባሪ፣
 ዒዛም ማዳ ዓሶዎ ታሚ ሎሰቶ ታ ማሃንዳኔ» ጌዔኔ።

8 ፔ ናዓሢ ዛሎ ጋዓንቴ፡-

«ያኦሲዮ! ኔኤኮ ካኣቱሞ ዎይታ ናንጊና ባይቁዎ ናንጋንዳኔ፤
 ኔኤኮ ካኣቱሞ ዒሉሞና ኔ ዔኪ ዓኣዳንዳኔ፤
 9 ዒሉሞ ኔ ናሽኪ ፑርቱሞ ኔ ዒፄኔ፤
 ዩያር ያኦሲ፣ ኔ ያኑዛሢ ኔና ደኦሪኔ፤
 ኔኤኮ ላጎይዳፓ ባሺ ዋዛ ዲቢሺ ኔኤም ዒዚ ዒንጌ» ጌዔኔ።

10 ዩያጉዲ ሃሃ፡-

1:5 1:5 ዓይኑ. 2:7፤ 2:4ሙ. 7:14፤ 1:ያኦሲ. ዓሃኬ 17:13። 1:6 1:6 ላሚ. ዎማ 32:43። 1:7 1:7 ዓይኑ. 10:4። 1:9 1:9 ዓይኑ. 45:6-7።

- «ጎዳሢዮ! ኔኤኒ ቤርታ ሳዖ ማዠፍኔ፤
 ጫሪንጮዋ ኔ ኩቻ ኔ ማዠፍያኬ።።
- 11 ዬያታ ቢያ ባይቃንዳኔ፤
 ኔኤኒ ጋዓንቴ ናንጊና ናንጋንዳኔ፤
 ዔያታ ዓፒላጉዲ ጨንቃንዳኔ።።
- 12 ሃሣ ኔ ዔያቶ ዳኤፒ ኮኦቴጉዲ ጳንጫንዳኔ፤
 ዓፒላጉዲ ዔያታ ላኦሚንታንዳኔ፤
 ኔኤኒ ጋዓንቴ ቢያ ዎዴ ኔናኬ፤
 ፔቴታዖ ኔ ጋርቹዎያኬ» ጋዓኔ።።
- 13 ዖኦሲ ፔኤኮ ከኢታንቸ ባኦካፓ፡-
 «ኔ ሞርኮ ታ ኔና ባሺሳንዳያ ሄላንዳኦና
 ታኦኮ ሚዛቆ ዛላ ዴዔ» ጌዔያ ፔቴታዖ ባኦሴ።።
- 14 ዓካሪ ከኢታንቸ ዳቃዘንሢ ማኦዳኒ ዖኦሲፓ ዳከንቴ ማዳ፡
 ዓያኖቱዋዓዳ?

2

ዴኤፖ ዳቂንቶ

1 ዬያሮ ኑ ዎይዜ ባኮይዳፓ ዳቢንቴ ኬሰኩዋጉዲ ኑ ዎይዜ ባኮ ኮሺ ጉሙርቂ ዓርቃንዳያ ኮይሳኔ። 2 ቤርታ ዖኦሲ ከኢታንቸ ዛሎና ኬኤዚንቴ ባካ ጎኔ ማዒ ዔርቴኔ፤ ዬያ ኬኤዚንቴ ባኮይዳፓ ዑሣ ዓኦዳሢና ዬያ ዓይሢንቴ ባኮ ኩንሠዋኦኦሣ ኮይሳ ሜቶ ዔካኔ፤ 3 ዓካሪ ኑኤኒ ሃሣ ሃያ ዴኤፖ ዳቂንቶ ቦሢ ሃሻያ ማዔቴ ዎዲ ኑ ቶሊ ዓታንዳይ? ሃያ ዳቂንቶ ቤርታዲ ጎዳ ኑም ፔኤሮ ኬኤዜኔ፤ ዎይዜ ዓሳኦ ጎኔ ማዒ ዔርቴኔ። 4 ዖኦሲያ ማላታና ዲቃሣ ባኦዚና ሃሣ ዲማ ዲማ ፔ ዎልቁና ማዲንታ ዓከ ባኦዚ ማዲሢና ዬያጉዲ ሃሣ ዒና ናሽኬሢጉዴያ ዓያኖ ጌኤዠ ዒንጌ ዒንጊዖ ዛሎና ፔኤሮ ማርካዴኔ።።

ዳቂንቶ ባንሢ ዔከ ዓኦዳ ዓርናሢ

5 ዖኦሲ «ሃጊ ሙካንዳኔ» ጌዒ ኑኤኒ ኬኤዛ ዓጮ ከኢታንቸ ዎይሣንዳጉዲ ጌይባኦሴ፤ 6 ዬያ ዛሎና ጌኤዠ ማፃኦፖይዳ ፔቴ ቤሰካ፡-
 «ኔ ማሊ ጳቂሣንዳጉዲ ዓሲንሢ ዓይጎ ባኦዚዳይ?
 ኔ ዔያቶ ዛሎ ማላንዳጉዲ ዓሲ ዓይጎ ባኦዚዳይ?»

7 ከኢታንቸይዳፓ ዳካ ኔ ዔያቶ ሂርከሴኔ።

ቦንቸንታያና ጋላቲንታያና ማዒያ ዔርዛ፣ ቦንቾ ባኮ ኔ ዔያቶ ቶኦካ ዓጌኔ፤

8 ቢያ ባኮዎ ዔያታ ዎይሣንዳጉዲ ኔ ማሄኔ»
ጌይንቲ ባኦዚ ዓኦኔ። ቢያሢ ዔያታ ዎይሣንዳጉዲ ማሃ ዎዶና ዔያታ ዎይሣንዳጉዲ ማሁዎዎ ሃሾና ባኦዚ ዓይጌያ ባኦሴ፤ ጋዓንቲ ሃሢ ቢያ ባኮ ዔያታ ዎይሣሢ ኑ ሃጊ ዛጊባኦሴ። 9 ሃሢ ጋዓንቲ ከኢታንቾይዳፓ ዳካ ሂርኪዶና፣ ዬሱሴ ሃይቢ ሜቶ ዔኬያታሢር ቦንቸንታያና ጋላቲንታያ ማዒያ ዔርዛ፣ ቦንቾ ባኮ ቶኦካ ዓጊ ዓኦንቲ ኑ ዛጋንዳኔ፤ ያኦሲ ዒዛም ዒንጌ ዒንጊዎና ዒዚ ኑ ዛሎር ሃይቄኔ።
10 ቢያ ባካ ዒዛም ሃሣ ዒዛና ናንጋ ያኦዛሢ ሚርጌ ናኦቶ ፔ ቦንቾ ባንሢ ዔኪ ሙካኒ ጌዒ ዳቂንቶኮ ዓርና ማዔ፣ ዬሱሴ ሜቶና ሜታሲ ጊኢጌያ ማሃኒ ኮይሳያ ማዔም ማዴኔ።

11 ዓሶ ያኦሲም ዲማሳሢና ዒዛ ዛሎና ያኦሲም ዲማዴያ ማዔ ዓሶና ፔቴ ዓዶ ናይኬ፤ ዬያር ዬሱሴ ዔያቶ «ታ ዒጊኖንሢየቱ» ጋዓኒ ሴልቁዎሴ። 12 ዬያ ዛሎ ጌኤዡ ማፃኦፖይዳ፡-

«ኔ ማዴ ባኮ ታ ዒጊኖም ታ ኬኤዛንዳኔ፤
ቡኪንቶ ባኦኮይዳ ዓይኑሞና ታ ኔና ጋላታንዳኔ» ጋዓኔ።

13 ዬያጉዲ፡-
«ታ ዒዛ ጉሙርቃንዳኔ» ጋዔኔ። ሃሣ ጊንሣ፡-
«ሃይሾ፣ ታኦና ያኦሲ ታኦም ዒንጌ ናኦቶና» ጋዓኔ።

14 ዬያር ናኦታ ዓሽኪና ሱጉሢና ዓኦ ዓሲ ማዔ ጎይዎ፣ ዬሱሴያ ዔያቶጉዲ ዓሲ ማዔኔ፤ ዬያ ዒ ማዴሢ ሃይቄ፣ ሃይቢዳ ቢታንቶ ዓኦ ፃላሄ ባይዛኒኬ። 15 ዬያጉዲ ሃሣ ፔ ናንጎ ዎዶ ቢያይዳ ሃይቢ ዒጊጨሢና ሃይቢ ዒጊቹሞም ዓይሌ ማዒ ናንጋ ዓሶ ዬያይዳፓ ኬሳኒኬ። 16 ዒዚ ሙኬሢ ከኢታንቾ ማኦዳኒቱዎንቲ ዓብራሃሜ ዜርዎ ማኦዳኒ ማሊኬ፤ 17 ዬያር ቢያ ባኦዚና ፔ ዒሾንሢንታ ሚሾንሢንታጉዲ ማዓኒ ዒዛ ኮይሳያ ማዔም ማዴኔ፤ ዬያ ዒ ማዴሢ ዓቶም ጋዓያና ጉሙርቁንታ፣ ቁኤሶኮ ዑሢ ማዒ ያኦሲም ማዳኒና ዓሶኮ ቢያ ጎሞ ባይዛኒኬ። 18 ዒዛ ጌሺ ዛጎና ዎዶና ዒ ሜቶ ዔኬያታሢር ሃሢ ጌሺዎና ዛጎዛንሢ ዒ ማኦዳኒ ዳንዳዓኔ።

3

ዬሱሴኮ ሙሴፓ ባሼ ማዒያ

2:8 2:8 ዓይኑ. 8:4-6። 2:12 2:12 ዓይኑ. 22:22። 2:13 2:13 ዓሲ. 8:17-18።

1 የኦሲኮ ዔኤሊያ ዋይዚ ዔኪ ዔዛም ደማዲያ ማዔ፥ ታ ዒሾንሦ! ታ ሚሾንሦ! ኑ ጉሙርቃንዳጉዲ ከኤዘም የኦሲፓ ዳኪንቴያ ማዔሢና ኑ ካኦሽካ ካኦዠኮዋ ቄኤሶ ቢያፓ ዑሣ ማዔ፥ ዩሱሴ ዛሎ ማሉዋቴ። 2 ሙሴ የኦሲ ዳሮ ዔኪ ዓኦዳያ ማዳ ማዳና ቢያ የኦሲም ጉሙርቃንቴያ ማዔሢጉዲ ዩሱሴ ዒዛ ደኦሬ፥ የኦሲም ጉሙርቃንቴያኩ። 3 ማኦሪ ማዠ ዓሢ ማኦሮይዲፓ ባሼ ቦንቺንታሢጉዲ ዩሱሴያ ሙሴይዲፓ ባሼ ቦንቺንታኒ ኮይሳያ ማዒ ጴዳኔ፤ 4 ጎኔኬ ፔቴ ፔቴ ማኦሮ ማዠ ዓሲ ዓሲ ዓኦኔ፤ ጋዓንቴ ቢያ ባኮ ማዠሢ የኦሲኩ። 5 ሙሴ ሃጊ ከኤዚንታንዳ ባኮ ዛሎ ማርካዲ ማርካዲ የኦሲ ዓሶ ዔኪ ዓኦዳያ ማዳ ማዳና ጉሙርቃንታ ማዳ ዓሲ ማዒ ማዳ። 6 ኪሪሰቶሴ ጋዓንቴ ማዳሢ የኦሲ ማኦሮይዳ ጉሙርቃንታ ናይጉዲ ማዒኬ፤ ዩይ ማኦራ ኑናኬ፤ ኑ ዒዛኮ ማኦሮ ማዓንዳሢ፡- ኑ ጉሙርቃ ባኮና ኑ የቶርቃ፥ ሃጊ ማዓንዳ ዋዘ ደዲሺ ዓርቄቴኩ።

የኦሲ ዓሶም ሃውሾ ጴዳንዳሢ

7 ዓያኖ ጌኤዣ ጋዓ ጎይያ፡-
 «ሃኖ ዒንሢ የኦሲኮ ዑኡዘ ዋይዛያ ማዔቴ፥
 8 ዓሲ ናንጉዋ ዳውሎይዳ ዒንሢኮ ዓደንሢ ታ ዋይታቴያ ጌዒ ማዳ
 ዋደና
 ዔያታ ዋይዘ ዒዳ ጎይያ
 ዒንሢኮ ዒኖ ደዲሺ ዋይዘ ዒዳያ ማሃፖቴ።
 9 ዒንሢኮ ዓደንሢ ዒ ዋይታቴያ ጌዒ ሚርጌ ባኦዚ ማዳ፤
 ሃሣ የይዲታሚ ሌዔ ታ ማዳ ባኮዋ ዔያታ ዛጌኔ»
 ጋዓኔ የኦሲ።
 10 «ዒማና ታ ዔያቶይዳ ዳጋዲ፥
 <ዒና ዔያቶኮ ቢያ ዋዳ ዳቢንታኔ፤
 ታ ጎይያዋ ዔያታ ዔሪባኦሴ» ጌዔ።
 11 ሃሣ፡- « ታኦኒ ዔያቶም ዒንጋንዳኔ ጌዔ፥
 ሃውሾ ቤዘ ፔቴታየ ዔያታ ጌላዓኬ» ጌዒ
 ዳጋና ታ ጫኦቄኔ» የኦሲ ጋዓ።
 12 ታ ዒሾንሦ! ታ ሚሾንሦ! ዒንሢዲፓ የኦኒያ ናንጊና ባይቁዋ
 የኦዛሢዲፓ ሃኪሳያና ፑርታ፥ ሃሣ ጉሙርቁዋ ዒናና ዓኦያ ማዒ
 ጴዳዋጉዲ ዒንሢና ዔራዋቴ። 13 ዒንሢ ባኦካፓ የኦኒያ ጎሜና
 ጌሺንቴም ዒና ዋይዚ ዒዳ ደዳያ ማዑዋጉዲ፤ «ሃኖ» ጌይንታሢ
 ዓኦ ጎይሣ ዓኦንቴ ቢያ ከሊ ዋላ ዘርቴ ዋሊ ደዲሹዋቴ። 14 ቤርታ

3:3 3:3 ፓይ. ማፃ 12:7። 3:7 3:7 ዓይኑ. 95:7-11።

ኩኩኩ ዓኣ ጉሙርቁዎ ጋፒንዎ ሄለንዳኣና ኑ ደዲሺ ዓርቃያ ማዕቤት ኪሪሰቶሴና ዎላ ማደ ባኮ ኑ ማደያ ማዕንዳኔ። 15 ዬይያ፡-

«ሃኖ ዒንሢ ያኦሲኮ ዑኡዞ ዎይዛያ ማዕቤት፡

ዒንሢኮ ዓደንሢ ዎይዞ ዒፃ ጎይዎ

ዒኖ ዒንሢኮ ደዲሺ ዎይዚ ዒፃያ ማሃፖት»

ጌይንቲሢፕጉዲኬ።

16 ዓካሪ ዬንሢ ዑኡዞ ዎይዚ ዓይሢንቶ ዒፃዞንሢ ያናንሢዳይ? ሙሴ ጊብፃፓ ዔኪ ኬሴ፥ ዓሶ ቢያሢቱዎዓዳ? 17 ያይዲታሚ ሌዔ ጉቤ ያኦሲ ዲጋሲ ናንጌ ዓሳ ዎኣቶዳይ? ዬያታ ጎሞ ማደም ሌዛ ዓሲ ናንጉዎ ዳውሎይዳ ኬኤሪንቲ ባቲዞንሢቱዎዓዳ? 18 ሃሃ «ታኣኮ ሃውሾ ቤዞ ጌላዓ» ጌዒ ጫኣቆናዞንሢ ዎንሢዳይ? ዬንሢ ዓይሢንቶ ዒፃዞንሢቱዎዓዳ? 19 ዓካሪ ጌላኒ ዔያታ ዳንዳዒባኣሢ ጉሙርቁዎዎ ዓቲዎና ማዕሢ ሃሢ ኑ ዛጋኔ።

4

1 ዓካሪ ዒዚ ኑሞ ዒንጋ ሃውሾይዳ ጌላንዳጉዲ ጌዒ ኑሞ ዒንጎና ሃጊ ማዕንዳ ዎዛ ሃጊ ዓኣ ጎይሢ ዓኣሢር ዒንሢዳፓ ያኦኒያ ዬኖ ሃውሾይዳ ጌሉዎዎ ዓቱዎጉዲ ቢያሢ ሂርጊ ኑና ኑ ካፖም።

2 ዓይጎር ጌዔቲ ኮዡ ሃይሶ ዬኖ ዎደና ዔያታ ዎይዜ ጎይዎ ኩኩኒያ ዎይዜኔ፤ ጋዓንቲ ዔያታ ዎይዜ ባኮ ጉሙርቁ ዔኪባኣሢር ዔያቶ ማኣዲባኣሴ። 3 ያኦሲ፡-

«ታኣኒ ዔያቶም ዒንጋንዳ ሃውሾ ቤዜሎ

ፔቲታዎ ዔያታ ጌላዓ ጌዒ ዲጋና ታ ጫኣቄኔ» ጌዔኔ።

ያኦሲኮ ማደ ሳዓ ማኲንቲሢዳፓ ዓርቃያ ማደንቲ ኩሜያ ማዕቤያ ኩኩኒ ጉሙርቃ ዓሳ ጋዓንቲ ዬኖ ሃውሾ ቤዜሎ ጌላንዳኔ።

4 ዎይቲ ጌዔቲ ላንካሳ ኬሎ ዛሎ ፔቲ ቤሲዳ «ያኦሲ ላንካሳ ኬሎና ማደ ሃሾኔ» ጌይንቲ ያኣፒንቲኔ። 5 ዬያጉዲ ላሚ ሃሃ፡-

«ታ ዔያቶም ዒንጋ ሃውሾይዳ ፔቲታዎ ዔያታ ጌላዓ» ጋዓኔ።

6 ዔያታ ኮዡ ሃይሶ ቤርታ ዎይዚ ዓይሢንቲባኣሢር ያኦሲ ዔያቶም ዒንጋኒ ጌዔ ሃውሾ ቤዞ ዔያታ ጌላባኣሴ፤ ጋዓንቲ ዒኣካ ጌላንዳጉዲ ጌይንቲ ፔቲ ፔቲ ዓሲ ዓኣኔ። 7 ቤርታ ዳውቲ ዛሎና፡

«ሃኖ ዒንሢ ያኦሲኮ ዑኡዞ ዎይዛያ ማዕቤት፡

ዒኖ ዒንሢኮ ደዲሺ ዎይዚ ዒፃያ ማሃፖት»

ጌይንቲሢፕጉዲ፥ ያኦሲ ሚርጌ ዎዴኮ ጊንፃፓ «ሃኖ» ጌይ ሜሌ ኬሊ ጌሢኔ።

4:3 4:3 ዓይኑ. 95:11። 4:4 4:4 ማኲ. ማፃ 2:2። 4:5 4:5 ዓይኑ. 95:11። 4:7 4:7 ዓይኑ. 95:7-8።

8 ዲያሱ ያኦሲ ዔያቶም ዲንጋንዳኔ ጌዔ ሃውሾ ዔያቶም ዲንጌያ ማዔያታቲ ያኦሲ ሃሣ «ሃኖ» ጌዒ ሜሌ ኬሊ ኬኤዚንዲዋያታንቴኤ። 9 ዓካሪ ያኦሲ ዳርኮ ዓይሁዶ ዓሶ ሃውሾ ኬሎ ማላ ሃውሾ ኬሊ ሃጊ ዓኣኔ፤ 10 ዬያሮ ያኦሲ ማዶ ሃሾሢጉዲ ያኦሲ ዲንጋ ሃውሾይዳ ጌላሢያ ማዶ ሃሻንዳኔ። 11 ዓካሪ ዬንሢ ዓሶንሢ ዓይሢንቶ ዲፃሢጉዲ ማዒ ኑ ዓቱዋጉዲ ያኦሲ ዲንጋ ሃውሾይዳ ጌላኒ ኑ ዶዶም።

12 ያኦሲኮ ቃኣላ ናንጊና ናንጋያ ሃሣ ማዶዋ ማዶያኤ፤ ላምያ ዘላ ጉቤ ዓጩ ማዔ፣ ጩንቻ ዓፓሮይዳፓ ባሽ ዓጩያኤ፤ ሽምፓሢና ዓያኖና፣ ሻዦና ጨጌጫ ካኣማ ካሮዋ ዲማሳንዳያ ሄላንዳኣና ቲቃያኤ፤ ዲናይዳ ዓኣ ማሊሢና ሱኡኤና ዔሪ ዋጋያኤ። 13 ያኦሲ ቤርቶይዳፓ ዓኣሺንታ፣ ዓይጎ ማዦንቲያ ባኣሴ፤ ዲዛ ቤርታ ቢያ ባኣዚ ፔጋዶያ ሃሣ ካሎ ማዒ ጴዳያኤ፤ ኩኤኒያ ኑ ያኦጨንታ ባኮ ማሂ ኬኤዚ ኮይሳሢ ዲዛ ቤርቶይዳኤ።

ዩሱሴ ቄኤሶኮ 0-9 ጳኤፒ ማዒያ

14 ዓካሪ ሌካ ጫሪንጮ ኬሰኤ፣ ቄኤሶኮ 0-9 ማዒ፣ ጳኤፒ ኩኡኮ ዓኣሢሮ ኩኡኮ ጉሙርቂያ ዶዲ ኑ ዓርቆም፤ ዬይያ ያኦሲ ናዒሢ፣ ዩሱሴኤ። 15 ኩኡኮ ዓኣ ቄኤሶኮ 0-9ሢ ማዒሢ ኑ ላቤቲ ሚጨንቲ ኩና ማኣዳኒ ዳንዳዒያኤ፤ ዲዚ ቢያ ባኣዚና ኑጉዲ ዳቢሻኒ ጌሻያይዳ ጌሌያኤ፤ ጋዓንቲ ዲ ዓይጎ ጎሜያ ማዶባኣሴ። 16 ዓካሪ ጎሜኮ ዓቶም ጌይሢ ኑ ዴንቃንዳጉዲና ኑም ኮይሳ ዋዶና ኩና ማኣዳ ያኦሲ ኮሹም ዲንጊያ ኑ ዴንቃንዳጉዲ ዲዛኮ ኮሹማ ጴዳ ካኣቲም ያይቶ ባንሢ ጉሙርቂሢና ኑ ሺኢኮም።

5

1 ቄኤሶኮ ቢያ 0-ሢ ማዒ ፔቲ ፔቲ ዓሳ ፔ ዓሶ ባኣካፓ ዶኦሪንታኔ፤ ዬያታ ያኦሲም ማዶንታ ባኮና ዓሲ ዘላ ዔቂ ጎሜ ዓቶም ጌይሳ ዲንጊያ ዲንጋኒ ዶኦሪንታኔ። 2 ዲዚ ፔ ቶኦኪና ላቢንታያ ማዒሢሮ ዔራቶ ዓሶና ላቢንታ ዓሶናም ሚጨንቲ ማኣዳኒ ዳንዳዒኔ። 3 ዲዚ ፔ ጎሞና ሜሌ ዓሶ ጎሞና ዘሎ ዲንጎ ባኮ ዲንጋኒ ዲዛ ኮይሴሢ ዬያ ዘሎናኤ። 4 ዓኣሮኔጉዲ ያኦሲ ዔኤሊባኣያ ማዒቲ ያኦሲያ ዬያ ቦንቾ ፔኤሮ ዴንቃ ዓሲ ባኣሴ፤

4:8 4:8 ላሚ. ዋማ 31:7፤ ዲያ. 22:4። 4:10 4:10 ማዦ. ማፃ 2:2። 5:3 5:3 ሊዋ. ዓኤ 9:7። 5:4 5:4 ኬሲ. ማፃ 28:1።

5 ዬያጉዲ ኪሪሰቶሴ ቄኤሶኮ ቢያ ዑሢ ማሃ፡ ቦንቾ ፔኤሮ ዔኪ ቦንቾንጥባኣሴ፤ ጋዓንቴ ዒዚ ቄኤሶኮ ቢያ ዑሢ ማሃ ቦንቾ ዔኬሢ፡-

«ኔኤኒ ታኣኮ ናዓሢኬ፤ ታኣኒ ኔኤኮ ሃኖ ዓዶ ማዔኔ» ጌዔ ያኦዛሢዳጋኩ።

6 ዬያጉዲ ሃሣ ማሌ ቤሰካ ያኦሲ፡-

«ማልኬ፣ ወይን ማዔ ዶኦሪንጥሢ፣ ኔኤኒ ናንገና ናንጋንዳ ቄኤሴኬ» ጋዓኔ።

7 ዬሱሴ ዓሲ ማዔ ሃያ ሳይዳ ናንጌ ዎዶና ሃይቢዳጋ ዒዛ ዳቂሻንዳ ያኦዛሢ ዳኤፒ ዒላቲና ሃሣ ዬኤኪ ዬኤኪ ፔ ማሊያ ኬኤዚ ሸኢቁኔ፤ ዒዚ ሸሌዑሞና ዓይሢንጥሢ ጥሰሲ ዒዛኮ ዒማና ሸኢጲ ዎይዜኔ። 8 ዎዚ ዒ ያኦሲ ናይ ማዔቴያ ዒዛ ሃሌ ማታሢ ዛሎና ዓይሢንጥሢ ዒ ዔሬኔ። 9 ዬያና ዒ ገኢጌያ ማዔ ጴጴሰካጋ፡ ዓይሢንጥሢን ማዔ ቢያ ናንገና ዳቂንጥኮ ካራ ማዔኔ። 10 ማልኬ፣ ወይን ማዔ ዶኦሪንጥሢ ያኦሲ ዒዛ ቄኤሶኮ ቢያ ዑፃሢ ማሃ ዶኦሬኔ።

ጉሙርቁያና ዓሳ ዶዳንዳጉዲ ላቲ ኬኤዚንጥ ባኣዚ

11 ዬያ ዛሎ ማርጌ ኑ ኬኤዛንዳ ባኣዚ ናንገጋንጥቴ ዑኬ ዒንሢም ዔኤቢ ጌሉዎኣሢ ማርጌ ኬኤዚ ዔርዛኒ ማቶኬ። 12 ሄኤዶ ሄሊ ዒንሢ ናንጌ ጎይያና ሴካ ዓሲ ዔርዛንዳያታያ ያኦሲ ቃኣሎኮ ዓይያ ካሮ ማሌ ዓሲ ሃጊ ዒንሢ ዔርዛንዳያ ኮይሳኔ፤ ዬይ ዒንሢም ኮይሳሢ ዲኣቁ ማዓንዳኣጋጥቴም ዶዲ ሙኡዚቱዋሴ። 13 ዓይጎሮ ጌዔቴ ዲኣቁ ሸሸንቁ ዑሾሢ ቢያ ናይ ማዔሢ ሂሉም ዛላ ዔራቶ ባኣዚ ሃጊ ዔሪባኣያኬ። 14 ዶዲ ሙኡዚ ኮይሳሢ ጋዓንጥ ኮዦና ፑርቶና ዲማሲ ዛጊ ዔሬ ዒናዳ ዓሲምኬ።

6

1 ኪሪሰቶሴ ዛሎ ኬኤዚንጥ፡ ቤርታሳ ዔርዛያ ሃሺ ማርጌና ዔርዛ ዔርዛያ ባንሢ ኑ ዓኣዶም፤ ገሠቶ ማዶ ማዔ፡ ጎሜ ቡኡዒሢ ዛላና ያኦሲ ጉሙርቁሢ ዛላና ገንሣ ኑ ሸሪ ሸሪ ዒዛ ዒንሢም ኬኤዛዓኬ። 2 ዬያጉዲ ዋኣሢ ማሰቲሢ ዛላ፡ ኪሪሰቶሴ ጉሙርቁ ዓሶ ዑፃ ኩቹ ጌሥሢ ዛላ፡ ሃይቁ ዓሶኮ ዔቁሢ ዛላ፡ ያኦሲ ናንገና ዎጋንዳ ዎጎ ዛሎ ላሚ ዒንሢም ኑ ኬኤዚ ኮይሱዋሴ። 3 ያኦሲ ጌዔቴ ዬያ ኑ ማዳንዳኔ።

5:5 5:5 ዓይኑ. 2:7። 5:6 5:6 ዓይኑ. 110:4። 5:7 5:7 ማቲ. 26:36-46፤ ማር. 14:32-42፤ ሉቃ. 22:39-46። 5:13 5:13 1ቆር. 3:2።

4 ጉሙርቂያ ሃሺ፣ ያኦሲ ጎይፃፓ ኬሰኬ ዓሶ ላሚ ያኦሲ ባንሢ ማሃኒ ደንዳዒንቱዋያኬ፤ ዬያቶም ሃያኮ ቤርታ ፖዒ ፖዒያኬ፤ ሃሃ ዔያታ ጩሪንጫፓ ዒንገንታ ዒንገሪዋ ዔኪ ዛጌያ፣ ዓያኖ ጌኤዠናኣ ዋላ ፔቱ ማዔያኬ፤ 5 ሃሃ ዔያታ ያኦሲኮ ኮዠ ቃኣሎና ሃጊ ሙካንዳ ዓጮኮ ዋልቆ ዛጊ ዔሬያኬ፤ 6 ዬያ ቢያ ዛጌሰካፓ ጉሙርቂያ ሃሺ፣ ኬሰኬ ዓሶ ላሚ ገንሣ ያኦሲ ባንሢ ማሃኒ ደንዳዒንቱዋሴ፤ ዓይጎሮ ጌዔቲ ዔያታ ያኦሲኮ ናዓሢ ላሚ ገንሣ ሱፃ፣ ዒዛኮ ቶኦኪያ ባይዚሳሢሮኬ።

7 ሚርጌ ዋዴ ዒዛይዳ ዋርቃ ዒሮ ዑሽካያ፤ ሃሃ ዒዛ ጎሽካሢም ኮይሳ ባኣዚ ባቃልሳያ ማዔ ሳዔሎ ያኦሲ ዓንጃኔ። 8 ዓንገሢና ጋውዲና ባቃልሳ ሳዔላ ጋዓንቲ ፓሣ ባኣዚ ባኣያ ጉሪ ማዓንዳኔ፤ ሃሃ ዒዛ ጋዳንቂንታኒያ ዑኬኔ፤ ጋፒንፃ ዒዛኮ ታሚና ሚቺንቲ ማዓንዳኔ።

9 ዓጊኖንሢሮቲ! ዋዚ ኑ ያዲ ጌዔቲያ ዒንሢኮ ዳቂንቶና ዋላ ዒንሢም ዒንገንቲ ኮሺ ባኣዚ ዓኣሢ ኑ ዔራኔ። 10 ያኦሲ ፒዜ ዋጋያታሢሮ ቤርታ ማዔቲያ ሃሢ ዒዛም ደማዴ ዓሶ ናሽኪ፣ ዒዛ ሱንፆሮ ዒንሢ ማኣዴ ማኣዴያ ዒ ዋሊንዲዋሴ። 11 ዒንሢ ቢያሢ ሃጊ ማዓንዳ ዋዛ ጌሢ ካፓ ባኮ ዴንቃንዲያ ሃሊንዳኣና ዒንሢ ደዲ ማዳ ማዳ ጋፒንሢ ሃሊሲ ማዳንዳጉዲ ኑ ኮዓኔ፤ 12 ኑ ኮዓሢ ጉሙርቂሢና ገቢ ደንዳዒሢና ደዲ ሃጊ ማዓንዳ ዋዛ ማሃ ዔያቶም ዒንገንቲ ባኮ ዴንቂ ዓሶጉዲ ማዖም ጌዒ ማዓንዳኣፓዓቲም ዋይዜ ባኮ ዑኬና ዔኩዋ ዓሲ ዒንሢ ማዓንዳጉዲቱዋሴ።

ያኦሲ ዒንጌ ሃጊ ማዓንዳ ዋዛ ሉኡቁዋያ ማዔሢ

13 ያኦሲ ዓብራሃሚም ሃጊ ማዓንዳ ዋዛ ዒንጋ ዋደና ዒ ሚሌ ዔኤሊ ጩኣቃንዳ ባኣዚ ባኣሢሮ ፔና ዔኤሊ፡- 14 «ጎኔና ታ ኔና ዓንጃንዳኔ፤ ኔኤኮ ዜርዖዋ ታ ሚርጊሻንዳኔ» ጌዒ ጩኣቄ። 15 ዓብራሃሚ ገቢ ደንዳዒ ካፒ፣ ዒዛም ዒንገንታንዳኔ ጌይንቲ ሃጊ ማዓንዳ ዋዛ ማሃ ኬኤዚንቲ ባኮ ዴንቂ። 16 ዓሲ ጩኣቃ፣ ፔጌዳፓ ዑሣ ባሻ ማዔ ባኣዚ ዔኤሊ ጩኣቄ፤ ዔያታ ጩኣቃ ጩኣቁማ ዔያቶ ባኣካ ዓኣ ጌኤዛ ጎናሳሢሮ ዔያቶኮ ማርማሢ ጋፓኔ። 17 ዬኖ ጎይፃ ያኦሲ ጌዔ ባኮ ሺርሺ ላኣሙዋያ ማዔሢ ዔርዛኒ ሃጊ ማዓንዳ ዋዛ ዴንቃ ዓሶም ዬያ ዋዛ ጩኣቁሞና ጎናሴኔ። 18 ያኦሲ ፔቲታ፣ ሉኡቁዋያኬ፤ ዒዚ ላምፃ ዬንሢ ላኣሚንቱዋ ባኮንሢና ኑኡኮ ቤርታ ሃጊ ዓኣ ዋዛ ኑ ዴንቃኒ ዒዛ ባንሢ ዓኣሺንቲ ጌሌ ዓሶ፣ ኑም ዴኤፒ ደዲም ዒዛፓ ዴንቃንዳጉዲ ኑና ማሃኔ። 19 ዬይ ሃጋኣ ዋዛ ኑኡኮ

6:8 6:8 ማዢ. ማፃ 3:17-18። 6:14 6:14 ማዢ. ማፃ 22:16-17።

ናንሳ ዓገጡዋያ ማሃ ጉሙርሳ ቱርቱሪኔ፤ ዬይያ፡- ጎኑቦና ዓገሎ ጊዳና ዓኣዲ ጌኤዡ ማኣርኮ ጋራ ዓኣ ጋር ጌላኔ። 20 ዬያ ጌኤዡ ማኣር ዬሱሴ ሜልኬ፣ ዬይያ፡- ቁኤሴ ማዒ ዶኦሪንጉ ኑ ዛሎር ቤርታዲ ቁኤሴኮ ቢያ ዑሢ ማዒ ናንገና ማዲኒ ዒኣካ ጌላኔ።

7

ቁኤሳሢ ሜልኬ፣ ዬይያ ዛላ

1 ዬይ ሜልኬ፣ ዬይያ ጎረቤት ሳላሜ ጌይንታ ካታሞኮ ካኣቲ፤ ሃሣ ዴኤፖ ያኣዛሢ ማኣ ማዲ ቁኤሴኔ፤ ዬይ ዓሢ ሚና ዓብራሃሜ ካኣቶ ያሎና ባሽ፡ ማዒ ሙካንቴ ጎይ፣ ካኣሚ ዓብራሃሜ ዓንጄኔ።

2 ዓብራሃሜ ዓሚና ዔኪ ሙከ ባካፓ ታጳይዳፓ ፔቴማ ኬሲ ኬሲ ዒዛሞ ዒንጌኔ፤ ዒዛ ሱንጾኮ ቡሊ፣ ላሞጾከ፤ ፔቴዛ፡- «ጂሉሞ ካኣቲ» ጌይንታዛ፡ ባጋ፡- «ሳላሜ ካታሞ ካኣቲኔ»፤ ዬና ጌይ፣ ኮሹሞ ካኣቲ ጌይሢኔ። 3 ሜልኬ፣ ዬይያ ዓደና ዒንደና ሃሣ ዒ ሾይንቴ ዜርሢያ ባኣያኔ፤ ዒዚ «ዬማፓ ዬማ ሄላንዳኣና ናንጌኔ» ጌይንቲ ዔርቱዋያ፡ ናንጎኮ ዒዛኮ ጋፒንሢ ባኣያኔ፤ ዒዚ ያኦሲ ናዓሢኮ ኮኣከንሢ ማዒ ናንገና ቁኤሴ ማዒ ናንጋኔ።

4 ሂንዳ ዬይ ዓሢ ዋማዒ ዴኤፒታቴያ ዛኩሞቲ! ዒሰራዔኤሌ ማኣር ዓሶ፣ ያኣሢ ማዔ፡ ዓብራሃሜ ታፖ ዒዚ ያሎና ዲዒ ዔኬ ባኮይዳፓ ታጳይዳፓ ፔቴማ ዒዛሞ ዒንጌኔ። 5 ቁኤሴ ማዒ ያኣቲ ጌሢንቴ ሌዊ ዜር፣ ፔ ዓሶይዳፓ ታጳፓ ፔቴማ ፔቴማ ዔካንዳ፣ ዲያቶ ማዒ ያይሢንቴኔ፤ ዬይ ያዲ ጌይንቴሢ ዓብራሃሜ ዜር፣ ፓ ዔካንዳ፣ ዲኔ። 6 ዬይ ሜልኬ፣ ዬይያ ሌዊ ዜር፣ ፓ ማዒ ባኣያታቴያ ዓብራሃሜ ዒንጌ ታጳሢዳፓ ፔቴማ ፔቴማ ዔኬኔ፤ ሃሣ ሃገ ማዒ ያዲ ዋዛ ዒንገንቴ ዓብራሃሜ ዒ ዓንጄኔ። 7 ዓንጄ ዓንጄንታሢዳፓ ዓንጄሢ ባሽ ማዒ ዔርቱያኔ። 8 ቁኤሳ ማዲ ጎይ፣ ታጳፓ ፔቴማ ፔቴማ ዔካዛንሢ ሃይቃ ዓሲ ማዔ፡ ሌዊ ዓሶኔ፤ ፔቴ ዛሎና ገንሣ ታጳይዳፓ ፔቴማ ፔቴማ ዔካሢ ባይቁዋያ ማዒ ናንጋያሢ ማርካዲንቴ ሜልኬ፣ ዬይያ፡- 9 ዓካሪ ታጳይዳፓ ፔቴማ ዔካንዳ፣ ኮይሳሢ ሌዊ ፔ ቶኦከና ዓብራሃሜ ዛሎና ሜልኬ፣ ዬይያ ዒንጌኔ ጌይሢኔ። 10 ዋይቴ ጌዔቴ ሜልኬ፣ ዬይያ ዓብራሃሜ ካኣሚ ዋደና ሌዊ ሃገ ፔ ዓደ፡ ዓብራሃሜ ያዳፓ ሾይንቴ ባኣያታሢ።

11 ዓካሪ ዒሰራዔኤሌ ዴርሞ ዋጋ ዒንገንቴሢ ሌዊ ዜር፣ ቁኤሴ ማዒ ማዲ ዳሞቦናኔ፤ ዬይ ዜር፣ ቢያ ባኮ ኮንሢ ማዲኒ ዳንዳዔያ ማዒ ያታቴ ዓኣርኔ ቁኤሴ ማዒ ማዲ

6:19 6:19 ሌዊ. ዓከ 16:2። 7:5 7:5 ፓይ. ማ፣ 18:21።

ጎይዖቱዋንቴ ማልኬፃዲቄጉዲ ደኦሪንቴ ማሌ ቄኤሴ ሙካኒ ኮይሲንዲዋያታንቴኩ። 12 ሃሢ ጋዓንቴ ቄኤሳ ላኦሚንቴ፣ ማሌ ሙካኦና ዋጋኦ ላኦሚንታንዲያ ኮይሳኔ። 13 ሃይ ቢያ ዒዛ ዛሎ ኬኤዚንቴ ቄኤሳሢ ማሌ ፃጳፓኬ፤ ዬኖ ፃጳፓ ጾኦኒያ ጾኦሲም ዒንጊ ካኦሽኮ ቤዛ ሙኪ ጾኦሲም ማዴይ ባኦሴ። 14 ኑ ጎዲሢ ዪሁዲ ዜርፃፓ ሙኪሢ ዔርቴያኬ፤ ጋዓንቴ ሙሴ ቄኤሶ ዛሎ ኬኤዛፃ ዪሁዲ ማኦር ዛሎ ኬኤዜ ባኦዚ ፔቴታፃ ባኦሴ።

ዩሱሰ ኪሪሰቶሴ ማልኬፃዲቄጉዲ ቄኤሴ ማዔሢ

15 ዬይ ባካ ኮሺ ፔጋዲ ዔርታንዲሢ ማልኬፃዲቄጉዲያ ማሌ ቄኤሴ ሙካዛኬ፤ 16 ዒዚ ቄኤሴ ማዔሢ ዓሲ ዋጌና ደኦሪንቴቱዋንቴ ባይቁዋያ ማዔ፣ ናንጊና ናንጋ ዋልቄና ደኦሪንቴኬ፤ 17 ዋይቲ ጌዔቴ፡-

«ማልኬፃዲቄ ቄኤሴ ማዔ ደኦሪንቴሢጉዲ፡

ኔኤኒ ናንጊና ናንጋንዲ ቄኤሴኬ»

ጌይንቴ ዒዛ ዛሎ ማርካዲንቴኔ። 18 ቤርታኦ ዋጋ ደዲ ማዔ ዴዓኒ ደንደዒባኦሢሢ ሃሃ ፓሡዋያ ማዔሢሮ ዓቴኔ፤ 19 ዓይጎር ጌዔቴ ሙሴ ዔርዜ ዋጋ ዓይጎ ባኦዚያ ፒዚሲ ጊኦጊሻኒ ደንደዒባኦሢሢ፤ ሃሢ ጋዓንቴ ጾኦሲ ባንሢ ዒዛና ኑ ዑካንዲያ ባሽ ኮሺ ማዔ፣ ሃጊ ማዓንዲ ዋዛ ኑም ሙኬኔ።

20 ዬይ ቄኤሴ ማዔፃ ዒዛም ጾኦሲ ጫኦቄባኦንቴ ማዔያቱዋሴ፤ ማሌ ቄኤሳ ጋዓንቴ ሃያኮ ቤርታ ቄኤሴ ማዔሢ ጫኦቆና ባኦዚ ባኦንቴኬ፤ 21 ዒዚ ቄኤሴ ማዔሢ ዒዛም ጫኦቆምኬ፤ ዋይቲ ጌዔቴ፡-

«ጎዲ ኔኤኒ ናንጊና ናንጋ ቄኤሴኬ ጌዒ ዒዛም ጫኦቄኔ፤

ዬያ ማሊፃ ዒ ሺርሹዋሴ»

ጌይንቴ ዒዛ ዛሎ ኬኤዚንቴያኬ።

22 ዬያ ጫኦቁም ዛሎና ዩሱሴ ቢያፓ ባሽ ማዔ፣ ጾኦሲ ጫኦቁምኮ ጾኦጪንታኒ ዔቄያ ማዔኔ።

23 ፔቴ ቄኤሴ ሃይቁዋያ ማዲ ማዲ ናንጋኒ ደንደዒባኦሢሢ ቤርታ ዋንዴ ማዴ ቄኤሶኮ ፓይዲ ሚርጌኬ፤ 24 ዩሱሴ ጋዓንቴ ናንጊና ናንጋያ ማዔሢሮ ቄኤሴ ማዔፃ ዒዛኮ ላኦሚንቴዋያኬ። 25 ዬያሮ ዒዛ ባንሢ ሙካ ዓሶ ዛሎ ሺኦቃኒ ናንጊና ባይቁዋያ ማዔ ናንጋሢሮ ዒዛ ዛሎና ጾኦሲ ባንሢ ሙካዞንሢ ቢያ ጎኔና ዳቄሻኒ ዒ ደንደዒኔ።

26 ዓካሪ፤ ኑም ኮይሳያ፣ ጾኦሲም ደማዴያ፣ ቦሢሳ ባኦዚ ባኦያ ማዔያ፣ ጌኤሺ ማዔያ፣ ጎም ዓሶፓ ደማዴያ፣ ጫሪንጮኮ ዑፃ ዴግ

7:17 7:17 ዓይኑ. 110:4። 7:21 7:21 ዓይኑ. 110:4።

ጌራ ቦንቸንጉቴያ፤ ያዲ ማዔ፥ ቁኤሴኮ ዑሢ ማዔያኩ ኑም ኮይሳሢ።
 27 ዒዚ ማሌ ቁኤሶኮ ዑፃ ማዔ ዓሶጉዲ ቤርታዲ ፔ ጎሞ ዛሎር፥
 ዩካፓ ዳር ጎሞ ዛሎር ቢያ ኬሊና ያኦሲም ዒንጎ ባኮ ዒንጋኒ ዒዛ
 ኮይሱዋያኩ፤ ዓይጎር ጌዔቴ ዒዚ ፔና ዒንጎ ባኦዚ ማሢ ዒንጌ ዋደና
 ዩይ ባካ ላሚ ማይ ማዲንቱዋጉዲ፥ ፔቴና ማዲ ዩያ ኩንሣሢሮኩ።
 28 ሙሴ ዔርዘ ዋጋ ቁኤሶኮ ዑፃ ማሢ ዶኦራሢ ላቤያ ማዔ ዓሶኩ፤
 ዋጎኮ ጊንፃፓ ሙኬ ያኦሲ ጫኦቁማ ጋዓንቴ ናንጊና ናንጋያ ማዔ፥
 ፒዜ ያኦሲ ናዓሢ ዶኦራ።

8

ዩሱሴ ዓኮ ጫኦቁሞኮ ጳኤፒ ቁኤሴ ማዒያ

1 ኑኡኒ ሃሢ ጌሰታ ባኮኮ ጳኤፖ ባካ ሃያኩ፤ ዩይያ፡-
 ጫሪንጮይዳ ጳኤፖ ያኦዛሢኮ ካኦቱሞ ያይቶኮ ሚዛቆ ዛላ
 ቦንቸንጉቴ ዴዔያ፥ ቁኤሴኮ ቢያ ዑሢ ማዔያ ኑኡኮ ዓኦያ ማዔሢ
 ዛሎኩ። 2 ዒዚ ማዲሢ ጎኔ ማዔ፥ ዓፒላፓ ማኸና ማኦርይዳኩ፤
 ዩያ ዓፒላፓ ማኸና ማኦር ደቁሢ ዓሲቱዋንጉቴ ያኦሲኩ።

3 ፔቴ ፔቴ ቁኤሶኮ ዑፃ ማዒ ዓሳ ዶኦሪንታሢ ያኦሲም
 ዒንጎ ባኮ ዒንጋኒኩ፤ ዩያር ዩያ ቁኤሶኮዋ ፔቴ ዒንጎ ባኦዚ
 ዋይቴቴያ ዓኦያ ማዒ ኮይሳኔ። 4 ዒዚ ሳያይዳታቴ ቁኤሶኮ ዑሢ
 ማዒንዱዋያታንጉቴኩ፤ ዓይጎር ጌዔቴ ሙሴ ዔርዘ ዋጎ ጎይያና
 ዒንጎ ባኮ ያኦሲም ዒንጋ ሃንጎ ቁኤሳ ዓኦሢሮኩ። 5 ዔያታ ማዲሢ
 ጫሪንጮ ማዲንታ ባኮኮ ኮኦኪንሢ ማዒና ዩያ ባኮኮ ሺቢ
 ማዔያኩ፤ ዩይያ፡- ሙሴ ዓፒላፓ ማኸንጉቴ ማኦር ኮሻኒ ጌዔ ዋደና
 ያኦሲ፡- «ዲኮይዳ ኔኤም ጴዳም፥ ኔ ዛጌ ጎይያ ቢያ ባኮ ኮሺ ዛጊ
 ማዲ» ጌራ ዓይሢ ጎይያናኩ። 6 ሃሢ ጋዓንጉቴ ዩሱሴ ያኦሲና ዓሲናኮ
 ባኦካ ማዔ፥ ጫኦቁማ ቤርታኦካፓ ባሺ ማዔሢጉዲ ዒ ሃሢ ማዲ
 ማዲኦ ዔያቶ ማዲይፓ ባሺኩ፤ ዩይ ዓርቂንጉቴ ማዲንታሢ ሚርጌና
 ኮሺ ማዔ፥ ዒንጊንጉቴ ሃጊ ማዒንዳ ዋዘ ቃኦሎናኩ።

7 ዋንዳኦ ጫኦቁሞይዳ ፔቴታያ ፓጩ ባኦዚ ባኦያ ማዔያታቴ
 ላምዓሳ ጫኦቁማ ሃሢ ኮይሲንዱዋያታንጉቴኩ። 8 ዓይጎር ጌዔቴ
 ያኦሲ ዳርይዳ ፓጩ ባኦዚ ዓኦሢ ጳኤቁሢሮ፥

«ዓካሪ ታኦኒ ዒሰራዔኤሌ ዳርና ዪሁዳ ዳርና ዋላ
 ዓኪ ጫኦቁማ ጫኦቃንዳ ዋዴ ሙካንዳኔ፤ ጌዔኔ።
 9 ዩይ ጫኦቁማ ዔያቶ ታ ጊብፆይዳፓ
 ኩጮ ዔያቶኮ ዓርቂ ኬሴ ዋደና

7:27 7:27 ላዊ. ዓኩ 9:7። 8:1 8:1 ዓይኑ. 110:1። 8:8 8:8 ዔር. 31:31-34።

ዔያቶኮ ዓደንሢና ዎላ ታ ጫኣቄ ጫኣቄሞጉዲቱዎሴ፤
ዓይጎር ገዔቴ ዔያታ ታኣኒ ጫኣቄ ጫኣቄሞ ደዲ ካፒባኣሢር
ታ ዔያቶ ቶኦዛዲ፡ ዙሌ ዔያቶም ገሣኔ።

10 ዓካሪ ሃካፓ ሴካ ዒሰራዔኤሌ ዳሮና ዎላ

ታ ጫኣቃንዳ ጫኣቄማ ያዲኩ፤ ጋዓኔ ጎዳ።

ታኣኒ ታ ዎጎ ዔያቶ ዒና ገሣንዳኔ፤

ዔያቶኮ ማሊያይዳ ታ ፃኣፓንዳኔ፤

ታ ዔያቶኮ ፆኦዛሢያ ማዓንዳኔ፤

ዔያታ ታ ዳሬ ማዓንዳኔ።

11 «ፆኦሲ ዔሬ ገዒ ፔ ዓጪ ዓሲም ማዎም

ፔ ገርሲምታቴያ ዔርዛንዳይ ባኣሴ፤

ዓይጎር ገዔቴ ዳኮ ዓሶ ገይንታሰካፓ ዳንዲ ዳኤፖ ሄላንዳኣና

ቢያሢ ታና ዔራንዳኔ።

12 ዔያቶኮ ዳቢንቶ ታ ዓቶም ጋዓንዳኔ፤

ጎሞዎ ዔያቶኮ ሃካፓ ሴካ ታ ዎላንዳኔ» ጎዳ ጋዓኔ።

13 ዓካራ፡- «ዓኪ ጫኣቄሞ» ገይያና ቤርታኣ ጫኣቄሞ ጨንቄያ
ማሄኔ ገይሢኩ፤ ዩያሮ ማዲ ጨንቄ ባካ ቢያ ባይቃንዳ ዎዳ ዑኩ።

9

ሳዓ ፆኦሲ ካኣሽኮ ጎይያና ጫሪንጫ ካኣሽኮ ጎይያ ዛላ

1 ሚናኣ ጫኣቃሢኮ ፆኦሲ ካኣሽኮ ጎይሢና ዩያኮ ሳዓ ማዢንቴ
ገኤሽ ማኣሪያ ዓኣኔ። 2 ዩይ ማዢንቴ ማኣራ ላምዎ ጋርሲ
ዓኣ ዓፒላና ማዢንቴ ማኣሪኬ፤ ዩኖኮ ቤርታሳ ጋርይዳ ዳጌ
ሎኣዢ ያይታንታ፡ ፖዒ ገሣ ሻርናንታ ፆኦሲም ዒንገንቴ ካሣንታ
ገሣንታያኩ፤ ዩና ቤዛ «ፆኦሲም ደማዳ ጋርሲ» ገይንታኔ።

3 ላምዓሳ፡ ጎኦቦ ዓፒሎኮ ሶንገኖ ጋራ ሜሌ ጋርሲ ዓኣኔ፤ ዩና
ጋራላ «ዑሣ ዓኣዳ ፆኦሲም ደማዳ ጋርሲ» ገይንታኔ። 4 ዩኖ
ጋራሎይዳ ዑንጅ ጨቢሶ ቤዛንታ ዎርቆና ዑፃ ጸርቂንቴ ታኣቦቶንታ
ዓኣኔ፤ ዩኖ ታኣቦቴሎ ጋራ «ማና» ገይንታ ሙኡዚ ዓርቄያ ዎርቄፓ
ኮሽንቴ ለማቴንታ ዓኣዒ፡ ቶሺ ዓኣ ዓኣሮኔ ኮኦሎንታ ፆኦሲኮ
ጫኣቄማ ፃኣፒንቲ ዓኣ ሹጮ ቆኦቄ ፃኣፖና ዓርሲንቴ ሹጫኣ ዓኣኔ።

5 ታኣቦቶ ዑፃ ዓኣ፡ ጎሞ ገኤሽያ ዔርዛ ጉኡፖ ጋኣዛና ካንቃ

9:2 9:2 ኬሲ. ማፃ 26:1-30፤ 25:31-40። 9:3 9:3 ኬሲ. ማፃ 26:31-33።
9:4 9:4 ኬሲ. ማፃ 30:1-6፤ 25:10-16፤ 16:33፤ ፓይ. ማፃ 17:8-10፤ ኬሲ. ማፃ
25:16፤ ላሚ. ዎማ 10:3-5።

ቦንቺንታ ከሩቤሌ ጌይንታዞንሢ ዓኣኔ፤ ጋዓንቴ ዬያ ባኮ ኑ ቢያ ፓይዲ ፓይዲ ከኤዚ ጋፒሳኒ ዳንዳዑቆሴ።

6 ቢያ ባካ ያዲዲ ጊኦጊሢኮ ጊንፃ ቄኤሳ ማዳ ማዳ ማዳኒ ዓፒሎና ማዢንቴ ማኣሮኮ ቤርታሳ ጋሬሎ ቢያ ከሌ ጌላኔ።

7 ሶንጌና ጋራ ዓኣ ላምዓሳ ጋሬሎ ጌላሢ ቄኤሶ ቢያኮ ሱኡጋሢ ሌሊከ፤ ዒዚ ጌላሢ፡- ለዔይዳ ፔቴና ሌሊከ፤ ዒዚ ፔ ጎሞና ዴራ ዔሩቆፃ ማዳ ጎሞሮ ፆኦሲም ዒንጎ ሱጉሢ ዔኩቆኣፃ ዒኢካ ጌሉቆሴ።

8 ዓፒሎና ማዢንቴ ቤርታሳ ማኣሬላ ዓኣ ጎይሢ ዓኣንቴ ዑሣ ዓኣዳ ፆኦሲም ዱማዳ ቤዜሎ ባንሢ ዔኪ ጌልዛ ጎይፃ ሃጊ ፔጋዲ ዔርተባኣፃ ማዒፃ ዓያኖ ጌኤዣ ዳቆኔ።

9 ዬይ ሃሣኣ ዎዶኮ ኮኣኪንሢከ፤ ዬያ ጎይፆና ፆኦሲም ዒንጊንታ ዒንጊፃ ዒንጋ ዓሢኮ ዒኖ ጌኤሽ፡፡ ፒዚሳኒ ዳንዳዑቆሴ፤ 10 ዬይ ቢያ ዓኮ ማዳ ሙካንዳያ ሄላንዳኣና ማዳንታንዳ ዓጪ ዳምቤከ፤ ዬንሢ ባካ ሙኡዚና ዑሺና ዛላ ሃሣ ዱማ ዱማ ዑሢ ጌኤሽሢ ላላ ማዳንታ ዳምቤ ሌሊከ።

11 ጋዓንቴ ከሪሰቶሴ ሃሢ ማዳንታ * ኮዢ ባኮኮ ቄኤሶ ቢያፓ ዑሢ ማዒ ሙኩኔ፤ ዓፒሎና ማዢንቴ፡ ዒዚ ጌሌ ማኣራ ዳኤፒ ሃሣ ፓጩ ባኣዚ ባኣያከ፤ ዬና ማኣራ ዓሲ ማዢባኣፃ ሃሣ ጊንሣ ሃያ ዓጩ ባኣዚና ማዢንቴባኣያከ።

12 ዒዚ ዑሣ ዓኣዳ ፆኦሲም ዱማዳ ጋሬሎ ላሚ ማዲሱቆ ጎይሢ ፔ ሱጉፆ ዔኪ ጌሊ ከንሣያፓዓቴም ቆኣሮና ዚኖ ጌማቶ ሱጉፆ ዔኪ ጌሊባኣሴ፤ ዬያይዲ ናንጊና ዳቂንታ ኑም ዒ ዳዲሼኔ።

13 ቆኣሮና ጌማቶ ዚኖ ሱጉፆ ሃሣ ቢዲንሢ ማሢ ሚቾ ባኣቶ ማራሢ ቢዲንፆ ዳቢንቴ ዒኢቴ ዓሶ ዑፆይዳ ፑጩፃ ዔያፓ ዓሽኮና ማዲ ዳቢንቴ ዒኢቴፆይዳፓ ጌኤሽ ፆኦሲም ዔያቶ ዱማሳያ ማዔቴ።

14 ናንጊና ናንጋ ዓያኖ ዛሎና ፔና ደንኪሳ ባኣዚ ባኣ፡ ፆኦሲም ዒንጎ ባኣዚ ማሢ ፔና ዒንጌ፡ ከሪሰቶሴኮ ሱጉፆ ባይቁዎ ፆኣዛሚም ኑ ማዳንዳጉዲ ኑኡኮ ዒኖ ዬያ ሃይቄያ ማዔ ማዳይዳፓ ዑሣ ዓኣዳ ዎዚ ጌኤሻንዳይ!

15 ዔኤሌንቴዞንሢ ፆኦሲ ሃጊ ማዓንዳ ዎዞና ዒንጌ ናንጊና ናንጎ ቤዞ ዳንፆንዳጉዲ ከሪሰቶሴ ፆኦሲና ዓሲናኮ ባኣካ ዓኮ ጫኣቁሞ ጊኢጊሼሢ ማዔኔ፤ ዬይ ያዲ ማዔሢ ዓሳ ቤርታኣ ጫኣቁሞ ዎጎ ጎይፆ ናንጌ ዎዶና ማዳ ጎሞይዳፓ ዳቂሻኒ ዔያቶ ዛሎ ዒዚ ሃይቄሢሮከ።

9:5 9:5 ከሲ. ማፃ 25:18-22። 9:6 9:6 ፓይ. ማፃ 18:2-6። 9:7 9:7 ሊዊ. ዓከ 16:2-34። * 9:11 9:11 ሃሢ ማዳንታ፡- ጋዓዞ ፔቴ ፔቴ ማፃኣፓ «ሃጊ ሙካንዳሢኮ» ጋዓኔ። 9:13 9:13 ሊዊ. ዓከ 16:15-16፤ ፓይ. ማፃ 19:9፤17-19።

16 ዔልቃሚ ዔልቃሚንቴቴ ዔልቃሚ ዓሢ ሃይቄያ ማዒያ ዔርታኒ ኮይሳኔ፤ 17 ዓይጎር ጌዔቴ ዔልቃሚ ዔልቃሚ ማዒሢ ዔልቃሚ ዓሢ ሃይቄቶኬ፤ ዔልቃሚ ዓሢ ሸምፔና ዓኣቴ ዬና ዔልቃሚ ጉሪ ማዒኔ። 18 ዬያ ጎይያ ቤርታኣ ጫኣቁማታዎ ሱጉሢ ለኣያ ጎኔ ጫኣቁሞ ማዑዋያኬ። 19 ሙሴ ያኦሲ ዒንጌ ዓይሢያ ቢያ ቤርታ ዴሮም ከኤዜሰካፓ ጌማቶ ዚዮና ዋኣሮ ሱጉያናይዳ ዋኣሢ ዋሂ፥ ዋጎ ማፃኣፖና ዴሮ ዑያናይዳ ቢያ ሂሶጴ ዒላዠና ዞቄ ማራቶኮ ጋፓኖና ዔኪ ዔኪ ፑጩኔ። 20 ዒዚ ፑጩሢያ፡- «ያኦሲ ዒንሢ ካፓንዳጉዲ፥ ዒንሢ ዓይሢ ጫኣቁሞ ሱጉያ ሃያኬ» ጌይኬ። 21 ዬኖ ጎይያ ዓፒሎና ማዠንቴ ማኣሮንታ ጋራ ማዶ ሜሆ ቢያሢዳ ሱጉያ ዒ ፑጩኔ። 22 ጎኔ ሙሴ ዔርዜ ዎጎና ዳካ ባኣዚዳፓ ዓታዞ ቢያ ባካ ሱጉሢና ጌኤሽካኔ፤ ሱጉሢ ላኣሊንቴባኣንቴ፥ ጎሜ ዓቶም ጌይንቴዋያኬ።

ኪሪሰቶሴኮ ዒንጎ ባኣዚ ማዒ ዒንጊንቴፃ ጎሜ ጌኤሻያ ማዒያ

23 ጫሪንጫ ማዶንታ ባኮኮ ኮኣኪንሢ ማዒ ባካ ቢያ ዬያ ዎጎና ያዳይዳ ጌኤሽካያ ማዒኔ፤ ጫሪንጫ ባካ ጋዓንቴ ዬያፓ ዑሣ ዓኣዳ፥ ያኦሲም ዒንጎ ባኣዚና ጌኤሽካኒ ኮይሳኔ። 24 ኪሪሰቶሴ ጎኔ ማዒ፥ ያኦሲም ዲማዴያ ማዒ ጋሬሎኮ ኮኣኪንሢ ማዒያ ሃሣ ዓሲ ማዠ ጋሬሎ ጌሊባኣሴ፤ ጋዓንቴ ዒዚ ሃሢ ኑ ጋይቴ ያኦሲ ቤርቶይዳ ዔቃኒ ጎኔና ዑሣ ዓኣዳ ያኣዛሢም ዲማዴያ ማዒ፥ ጫሪንጫ ዓኣዳኔ። 25 ዓይሁዶ ዓሶኮ ቄኤሶ ሱኡጋሢ ፔ ሱጉሢ ማዒባኣ ሱጉሢ ዔኪ ለዓ ለዓ ዑሣ ዓኣዳ ያኦሲም ዲማዴ ቤዞ ጌላያኬ፤ ኪሪሰቶሴ ጋዓንቴ ፔና ሚርጌ ዎዴ ሸርሺ ሸርሺ ዒንጎ ባኣዚ ማሂ ዒንጋኒ ዒኣካ ጌሊባኣሴ። 26 ያዲ ማዒያታቴ ዓጫ ማዠንቴማፓ ዓርቃዎ ሜቶ ዔኪ ዔኪ ናንጋንዳያ ዒዛም ኮይሳንዳያታንቴኬ፤ ሃሢ ጋዓንቴ ዎዶኮ ጋፒንያይዳ ጎሜ ጌኤሻኒ፥ ፔና ያኦሲም ዒንጎ ባኣዚ ማሂ ዒንጋኒ ለሚንቴዋ ጎይሢ ፔቴና ሙኪ ጴዳኔ። 27 ዓሲ ፔቴና ሃይቄ፥ ዬካፓ ጋፒንሢ ዎጌም ሸኢካንዳጉዲ ጌይንቴያኬ። 28 ዬያጉዲ ኪሪሰቶሴ ሚርጌ ዓሶኮ ጎሞ ጌኤሻኒ ፔቴና ሃይቄኔ፤ ለሚ ዓሲኮ ጎሞ ፔ ዑፃ ማሃንቴዋንቴ ጉሙርቂ ዒዛ ካፓዞንሢ ሃይሲፓ ዓውሳኒ ለሚሣ ዒዚ ሙካንዳኔ።

10

1 ሙሴ ዔርዜ ዎጋ ሃጊ ሙካንዳ ኮኮ ባኮኮ ኮኣኪንሢ

9:20 9:20 ኬሲ. ማፃ 24:6-8። 9:21 9:21 ለዊ. ዓኬ 8:15። 9:22 9:22 ለዊ. ዓኬ 17:11። 9:28 9:28 ዒሲ. 53:12።

ማዓንዳኢፓዓቲም ጎኔ ዬያ ኮዦ ባኮቲዋሴ፤ ዬያሮ ሌዓ ሌዓ ቢያ
 ዋዴ ያኦሲም ዒንገንጎታ ባካ ዒንጎ ዓሶ ጌኤሽ፡፡ ፒዚሳኒ ዳንዳዓውዋሴ፡፡
 2 ዬይ ዋጋ ዋንዳ ጌኤሽ፡፡ ፒዚሳኒ ዳንዳዓያ ማዔቲ ዔያታ ያኦሲም
 ዒንጎ ባኮ ሃሽያ ናንዳንቴኬ፤ ዋይቲ ጌዔቲ ካኣዦሮ ጌላ ዓሳ
 ላሚሱዋ ጎይሢ ጎማፓ ጌኤሽኬያ ማዓንዳሢሮ ዔያቶ ዒኖይዳ
 ጎሜ ዔያቶኮ ባኣያ ማዔሢ ዔያቶም ዔርታንዳኔ፡፡ 3 ዬይ ያኦሲም
 ዒንጎ ባካ ጋዓንቴ ሌዖይዳ ሌዖይዳ ዔያቶኮ ጎሞ ጰቂሣያኬ፡፡
 4 ዋይቲ ጌዔቲ ጌማቶ ዚኖና ዋኣሮናኮ ሱጉፃ ጎሜ ጌኤሻኒ
 ዳንዳዓውዋኣሢሮኬ፡፡

5 ዬያሮ ኪሪሰቶሴ ዓጮ ሙኬ ዋደና፡-
 «ኔኤኒ ኔኤም ዒንጎ ባኣዚ ኮይባኣሴ፤
 ጋዓንቴ ኔ ታኣም ዓሲ ዑሢ ዒንጌኔ፡፡

6 ኔኤም ሚቺ ዒንጎ ባኮና
 ጎሜ ጌኤሻኒ ዒንጎ ባኮና ኔ ዋዛዲባኣሴ፤

7 ዬማና ታ፡-
 ታ ያኣዛሢዮ! ማፃኣፖይዳ ታ ዛሎ ፃኣፒንቴሢጉዲ
 ኔ ማሊያ ኩንሣኒ ሃይሾ ታ ሙኬኔ» ጌዔኔ፡፡

8 ዋጋ ዬይ ማዲንታንዳጉዲ ዓይሢቲያ ዒዚ ጋዓንቴ ቤርታ፡-
 «ያኦሲም ዒንጎ ዲማ ዲማ ባኮንታ ሚቺ ዒንጎ ባኮ፡ ዬያጉዲ ሃሣ
 ጎሞ ዛሎ ዒንጎ ባኮዋ ኔ ኮይባኣሴ፤ ዬያና ሃሣ ኔ ዋዛዲባኣሴ»
 ጌዔኔ፡፡ 9 ዬካፓ ሃሣ፡- «ሃይሾ ኔ ማሊያ ኩንሣኒ ታ ሙኬኔ» ጌዔኔ፤
 ዬያይዲ ላምዓሶ፡ ያኦሲም ዒንጎ ጎይያ ቤዞ ጌልዛኒ ቤርታ ያኦሲም
 ዒንጎ ጎይያ ላኣሚኔ፡፡ 10 ዬሱሰ ኪሪሰቶሴ ፔ ዑያ ላሚ ዒንገንጎቲዋ
 ጎይሢ ፔቲና ያኦሲም ዒንጎ ባኣዚ ማሂ ሺኢሽሢሮ ኦኡኒ ያኦሲም
 ዲማዴያ ማዔኔ፤ ዬኖ ያኦሲ ዒ ማዲንዳጉዲ ኮዔ ማሊያኬ፡፡

11 ፔቲ ፔቲ ዓይሁደ ዓሶኮ ቄኤሳ ጎሜ ጌኤሻኒ ዳንዳዓውዋ ዬንሢ
 ዒንገይንሢ ቢያ ኬሊ ዒንገ ዒንገ ዓቲዋያ ማዲኔ፡፡ 12 ኪሪሰቶሴ
 ጋዓንቴ ናንገና ዒንገንጎቲያ ማዓ፡ ዒንገይ ፔቲና ዒንጌሰካፓ ያኦሲ፡
 ዓዳሢኮ ሚዛቆ ዛላ ቦንቺንጎቲ ዴዔኔ፡፡ 13 ዬማፓ ዓርቃያ ዴንዲ
 ዓዛኮ ሞርኮ ያኦሲ ዒዛ ባሺሳንዳያ ሄላንዳኣና ዒኢካ ዴዒ ዒ
 ካፓኔ፤ 14 ዓይጎር ጌዔቲ ያኦሲም ዲማዴዞንሢ ፔቲና ያኦሲም ዒንጎ
 ዒንገይ ዛሎና ናንገና ዔያቶ ዒ ጌኤሽ፡፡ ፒዚሰሢሮኬ፡፡

15 ዓያኖ ጌኤዣ ዬያ ባኮ ዛሎ ኦም ማርካዲያ ቤርታዲ፡-
 16 «ዬካፓ ታ ዔያቶና ዋላ ጫኣቃንዳ ጫኣቂማ ያዲኬ፤

10:5 10:5 ዓይኑ. 40:6-8፡፡ 10:11 10:11 ኬሲ. ማፃ 29:38፡፡ 10:13
 10:13 ዓይኑ. 110:1፡፡

ታኣኮ ዎኅ ዒና ታ ዔያቶኮ ገሣንዳኔ፤
ማሊያይዳኣ ታ ዔያቶኮ ፃኣፓንዳኔ።»

17 ሃሣ፡-

«ዔያቶኮ ጎሞንታ ፑርቶ ማድንታ ሃካፓ ሴካ ታ ጳቂሣዓኬ»
ጎዳ ጋዓኔ፤ ገዔኔ።

18 ዬያሮ ጎሜ ገኤሽኬሢኮ ጊንፃ ጎሜ ገኤሻጊ ያኦሲም ዒንጊንታ
ዒንጊሢ ዓታንዳኔ።

ያኦሲ ባንሢ ኑ ሙካንዳያ ኮይሳያ ማዒያ

19 ዓካሪ ታ ዒሾንሦ! ታ ሚሾንሦ! ዬሱሴ ሱጉያ ዛሎና ያኦሲም
ዑሣ ዓኣዴ ዲማዴ ጋሬሎ ገልዛንዳ ጉሙርሳ ባኣዚ ኑ ዴንቄኔ፤
20 ኦኦኒ ገልንዳሢ ጎኦቦ ዓፒሎይዴና ገይፃ፣ ዓዛኮ ዑያ ጊዴና
ዒ ኑም ቡሌ፣ ዓከ ሃሣ ናንጊና ናንጋያ ማዔ ጎይፃናኬ። 21 ያኦሲ
ማኣር፣ ጫሪንጮሲዳ ቢታንቶ ዓኣ ዴኤፒ ቁኤሴ ኦኡኮ ዓኣኔ፤
22 ዬያሮ ኦኡኮ ፑርቶ ዒና ገኤሽካንዳጉዲ ዒኖ ፑጨንቲ፣ ዑያዎ
ኦኡኮ ገኤሽካ ሞኣሢና ማሰቲ፣ ፒዜ ዒናና ሃሣ ጎኔ ጉሙርቁሢና
ያኦሲ ባንሢ ኑ ሙኮም። 23 ኑም ሃጊ ማዓንዳ ዎዞ ቃኣሎ ዒንጌ
ያኦዛሢ ጉሙርቁንታያ ማዔሢሮ ሃሢ ኑ ጉሙርቁ ማርካዳ፣ ሃጊ
ማዓንዳ ዎዞ ደዲሺ ኑ ዓርቆም። 24 ናሹሞና ኮሺ ማዳ ማዲሢና
ጴጪ ኑ ናንጋንዳጉዲ ፔቴይ ባጋሢ ጴቻያ ማፃንጎ። 25 ቢያ ዎዴ ዎላ
ኦ ካኣሚ ካኣሚ ዎሊ ኦ ደዲሾም፤ ጋዓንቲ ፔቴ ፔቴ ዓሳ ማዳ ጎይፃ
ኦኡኮ ዎላ ቡከንታ ቡከንቶ ኦ ሃሺባኣያታቴ ቃራኬ፤ ጎዳኮ ሙኮ ከሌ
ዑኬሢ ዒንሢ ዛጋያታሢሮ ዬያ ባኮ ዑሣ ዓኣዴ ማዲሞቴ።

26 ጎኔ ማዔ ባኮ ኑ ዔሬሢኮ ጊንፃ ዔሬያ ኦ ጎሜ ማዳቴ ሃካፓ
ሴካ ጎሜ ዛላ ያኦሲም ዒንጊንታንዳ ባኣዚ ዓይጌያ ኦም ባኣሴ።
27 ጋዓንቲ ኦና ካፔሢ ሃጊ ሙካንዳ፣ ዒጊቻ ያኦሲኮ ዎጊያና ዒዛ
ዒፃ ሞርኮ ዒ ሚቻንዳ ዒጊቻ ዴኤፖ ታሞናኬ። 28 ሙሴ ዔርዜ
ዎኅ ዳቤ ዓሲዳ ላምፃ ሃንጎ ሃይሦ ዓሲ ማርካዳቴ ሃሺሢ ባኣያ ዬያ
ዓሢ ዎዎድ። 29 ዬይ ያዲ ማዓያ ማዔቴ ያኦሲ ናዓሢ ቦሃሢ፤ ሃሣ
ያኦሲም ዲማዴ ጫኣቁሞ ሱጉያ ፓሡሞ ባኣዚ ማሢ ዛጌሢ፤ ጊንሣ
ሃሣ ኮሹሞና ዒንጊንቲ ዓያኖ ጫሽኬሢ ዎማዲ ፑርታ ዎጌ ሄላንዳያ
ዒንሢም ማላይ? 30 ዎይቲ ገዔቴ፡- «ኮሜ ዔካሢ ታናኬ፤ ኮሞ ታ
ማሃንዳኔ» ገዔሢ ያና ማዔቴያ ኦ ዔሬኔ፤ ዬያጉዲ ሃሣ፡- «ያኦሲ

10:16 10:16 ዔር. 31:33። **10:17** 10:17 ዔር. 31:34። **10:22** 10:22
ሌዊ. ዓከ 8:30፤ ሂዚ. 36:25። **10:27** 10:27 ዒሲ. 26:11። **10:28** 10:28
ላሚ. ዎማ 17:6፤ 19:15። **10:29** 10:29 ኬሲ. ማፃ 24:8።

ፔ ዳርይዳ ዋጋንዳኔ» ጋዓኔ። 31 ናንጊና ናንጋ የአዛሢና ዋጊነቲሢ ሚርጌ ዒጊቻያኩ።

32 ፖዓ ዒንሢሢም ፖዔሢኮ ጊንፃ ሚርጌ ሜቶ ዒንሢ ዔከ፣ ዳንዳዒ ዓአሜ፣ ዩንሢ ቤርታአ ዋደንሢ ማሊ ጳቂሡዋቲ። 33 ፔቲ ፔቲ ዋደና ዓሲ ቤርቲዳ ዒንሢ ጫሽኪንቲኔ፤ ሚርጌ ሜቶዋ ዒንሢ ዛጌኔ፤ ሃሣ ዩያጉዴ ሜታሢ ሄሌ ዓሶና ዋላ ፔቲ ማዒ ዔያቶ ሜታሢ ዒንሢያ ዔኩኔ። 34 ዒንሢ ባሼ ኮሺ፣ ሃሣ ቢያ ዋደ ናንጋ ቆሎ ጫሪንጮይዳ ዓአሢ ዔሪሢረ ቲኡቲ ዓሶ ሚጫንቲ ዒንሢ ማአዴኔ፤ ቆላ ዒንሢኮ ቡሪንቲ ዔውቲ ዋደና ዋዛና ዒንሢ ዩያ ጊቢ ዳንዳዔኔ። 35 ዓካሪ ዩያ ዒንሢ ማዴሢ ዛሎ ዒንጎንዶ ጴኔፖ ባኮ ዴንቃኒ ጉሙርቂ ዒንሢ ጫርቃ ጫርሹሞ ሃሺፖቲ። 36 የኦሲኮ ማሊያ ኩንሢ የኦሲ ዒንሢም «ዒንጋንዳኔ» ጌዒ ጫአቂ ባኮ ዴንቃኒ ደዳንዳያ ዒንሢም ኮይሳኔ። 37 ዓይጎር ጌዔቲ፡-

«ሙካኒ ኮይሳሢ ዳካ ዋዴኮ ጊንፃ ሙካንዳኔ፤ ኔጊንዲዋሴ፤

38 ፃሎ ዓሲ ጋዓንቲ ጉሙርቂሢና ሸምፖ ዴንቃንዳኔ፤ ጊንሢም ሎኦሺቲ ጋዓንቲ ዩይ፣ ታና ዋዛሳያቲዋሴ»

ጌይንቲ ፃአፒንቲኔ። 39 ጋዓንቲ ኦኡኒ ጉሙርቂ ዳቃ ዓሶ ዛላ ማዔያኩ፤ ጊንሢም ሎኦሺ ባይቃ ዓሶ ዛላ ማዔያቲዋሴ።

11

ጉሙርቂሢ

1 ጉሙርቂሢ ጌይሢ ሃጊ ማዓንዳ ዋዛ ጌሢ ኑ ካፓ ባኮ ኑ ዴንቃንዳያታሢ ዔሪሢ፤ ሃሣ ኑ ዛጊባአ ባኮ ዓአያ ማሢ ዛጊሢኩ።

2 ቤርታአ ዓሶም ማርካዲንቲሢ ዔያታ ጉሙርቂሢረኩ።

3 ሳዎንታ ጫሪንጮንታ ጊዳ ዓአ ባካ ቢያ የኦሲ «ማዎንጎ» ጌዔሢና ማዢንቲያ ማዔሢ ኑ ዔሪሢ ጉሙርቂሢናኩ፤ ዩያር ኑም ሃሢ ጴዳ ባካ ቢያ ጴዳዋ ባአዚዳፓ ማዢንቲሢ ዩያና ኑ ዔሪሪ።

4 ዓአቤኤሌ ቃአዔኤሌ የኦሲም ዒንጌ ዒንጊይይዳፓ ባሻያ የኦሲም ዒንጌሢ ጉሙርቂሢናኩ፤ የኦሲ ዓአቤኤሌ ዒንጌ ዒንጊይ ዋዛና ዔኩ ዋደና ዓአቤኤሌ ጉሙርቂዎና ፃሎ ማዔሢ ማርካዲንቲኔ፤ ዓአቤኤሌ ሃይቂያ ማዔቲያ ሃሮ ሄላንዳአና ዒዛኮ ጉሙርቂዎ ዛሎና ዒ ኬኤዚ ኬኤዚ ዓአኔ።

10:30 10:30 ላሚ. ዋማ 32:35-36። 10:38 10:38 ዒምባ. 2:3-4። 11:3 11:3 ማዢ. ማፃ 1:1፤ ዓይኑ. 33:6-9፤ ዮሃ. 1:3። 11:4 11:4 ማዢ. ማፃ 4:3-10።

5 ሄናኬ ሃይቢ ሃይቁዋጉዲ ሌካ ጫሪንጮ ዔውቴሢ ዒ ጉሙርቁሢሮኬ፤ ያኦሲ ዒዛ ዔኬሢሮ ዒ ጴዲባኣሴ፤ ዒ ዔውጉንዳሢኮ ቤርታ ያኦሲ ዒ ዎዛሴያ ማዔሢ ማርካዲንቴኔ።
 6 ጉሙርቁሢ ባኣንቴ ያኦሲ ዎዛሳኒ ዳንዳዒንቴዎሴ፤ ዓይጎር ጌዔቴ ያኦሲ ባንሢ ሙካሢ ያኦሲ ዓኣያ ማዔሢና ዒዛ ዒናፓ ኮዓዘንሢሞ ዒ ዒንጋንዳ ባኣዚ ዓኣሢ ጉሙርቁንዳያ ኮይሳሢሮኬ።

7 ሃጊ ጴዲባኣ ባኮር ያኦሲ ላቲ ዒዛም ኬኤዜ ዎዶና ኖሃ ያኦሲ ዒጊጪሢና ማኣር ዓሶ ዳቁሻኒ ዎኣዎ ካኣሚሎ ኮሽሢ ጉሙርቁሢኬ፤ ዬያ ጉሙርቁዎና ዓጮ ዓሶ ቢያ ዳቢንቴያ ማሃ ዒዚ ሃሽኔ፤ ጉሙርቁዎና ጴዲ ጂሎሞዎ ዒ ዴንቄኔ።

8 ዓብራሃሜ ፔ ዓጪ ማሃ ዔካንዳ ቤዘ ዓኣዳንዳጉዲ ያኦሲ ዒዛ ዔኤሌ ዎዶና ዓንኮ ዓኣዳቴያ ዔሪባኣያታዎ «ዔኤ» ጌዒ ዓይሢንቲ ዓኣዳሢ ጉሙርቁሢኬ። 9 ሃሃ ዒዛጉዲ ሃጊ ማዓንዳ ዎዘ ዴንቃንዳ፣ ዪሳኣቁና ያይቆኦቤና ዎላ ሃጋኣ ዎዘ ማሃ ዒንጎና ዓጩሎይዳ ሙኬ ዓሲ ማዒ፣ ዓፒላና ማኸንቴ ማኣርይዳ ዒ ናንጌሢ ጉሙርቁሢኬ። 10 ዓይጎር ጌዔቴ ዶዲ ቦኦኮሎና ማኸንቴ፣ ያኦሲ ማኸን ዓርቁ ማኸ ካታሞ ዒ ካፓያታሢሮኬ።

11 ዓብራሃሜ ዎዚ ጋርቼያ ማዔቴያ ሃሃ ሳኣራ ዘኣኮ ማዔቴያ ሃጊ ማዓንዳ ዎዘ ዒንጌሢ ጉሙርቁንታያ ማሃ ዒ ዛጌሢሮ ጉሙርቁሢና ናይ ዓዶ ማዔኔ። 12 ዬያር ዬያ ሃይቁያጉዲ ማዔ፣ ዓብራሃሜይዳፓ ጫሪንጮ ዠኣጋሢጉዲ ሚርጌያ ሃሃ ባዘ ዓጫ ዓኣ ፓይዲንቴዎ ማኣሻሎጉዴ ዲቢ ዜርሢ ዒዛይዳፓ ኬሰኬ።

13 ዬያታ ቢያ ሃይቁሢ ጉሙርቁ ጎይሢ ዓኣዎኬ፤ ያኦሲ ዔያቶም ዒንጋኒ ጫኣቁ ጫኣቁም ባኮዎ ዔያታ ዴንቁባኣሴ፤ ጋዓንቴ ሃኬና ዛጊ፣ ዓዳ ዴንቁያ ማሃ ዔያታ ዎዛዴኔ፤ ሳይዶዳኣ ሸኦቹ ሃሃ ሙኬ ዓሲ ማዔያታሢያ ዔያታ ዔሪ ማርካዴኔ። 14 ያዲ ጌዒ ማላ ዓሳ ዔያቶም ማዓ ዓጪ ዓኣያ ማዔም ዔያታ ካፓያታሢ ዔርታኔ። 15 ዬኖ፣ ዔያታ ዎንዴ ሃሺ ኬሰኬ ዓጩሎ ሄኤዶ ጳቁሢ ማላያታቴ ዒዘ ባንሢ ማዒ ዴንዳንዳያታዎኬ። 16 ሃሢ ጋዓንቴ ባሼ ማዔያ፤ ሃሃ ጫሪንጮይዳ ዓኣ ዓጩ ዔያታ ጳቁሢ ማላኔ፤ ዬያፓ ዔቁያና ያኦሲ ዔያቶም ካታማ ጊኣጊሽሢሮ «ኮ ያኣዛሢ» ጌዒ ዔያታ ዔኤሌቴ ዒዛ ቦርሳያቴዎሴ።

11:5 11:5 ማኸ. ማዓ 5:21-24። 11:7 11:7 ማኸ. ማዓ 6:13-22። 11:8 11:8 ማኸ. ማዓ 12:1-5። 11:9 11:9 ማኸ. ማዓ 35:27። 11:11 11:11 ማኸ. ማዓ 18:11-14፤ 21:2። 11:12 11:12 ማኸ. ማዓ 15:5፤ 22:17፤ 32:12። 11:13 11:13 ማኸ. ማዓ 23:4፤ 1ዮኦሲ. ዓሃኬ 29:15፤ ዓይኦ. 39:12።

17 ዓብራሃሜ ወይታቴያ ዛጋኒ ያኦሲ ማዳ ወደና ዒዚ ዪሳኦቄ ያኦሲም ዒንጎ ባኣዚ ማሂ ዒንጌሂ ጉሙርቁሂናኩ፤ ሃጊ ማዓንዳ ወዞ ዴንቁ፣ ዓብራሃሜ ፔኤኮ ፔቴ ናዓሂ ጎኔ ሹካኒ ዒማና ጊኢጌ።

18 ዪይ ናዓሂ «ኔ ዜርፃ ዪሳኦቄ ሱንፆና ዔኤሊንታንዳ» ያኦሲ ዒዛም ገዔሂኩ። 19 ያኦሲ ሃይቁ ዓሶ ሃይቢዳፓ ዔቁሳኒ ዳንዳዓሂ ዓብራሃሜ ጉሙርቁሂሮ ዒማና ዪሳኦቄ ሃይቢዳፓ ዔቁያ ማሂ ዒ ዛጌ።

20 ዪሳኦቄ ሃጊ ማዓንዳ ባኮ ማሊ ያይቆኦቤና ዔኤሳዎና ዓንጄሂ ጉሙርቁሂናኩ።

21 ያይቆኦቤ ሃይቃኒ ዑካዎ ዮሴፔ ናኦቶ፣ ፔቴ ፔቴሂ ዓንጄሂ ሃሃ ዒ ኮኦላዲ ሃንታ ኮኦሎና ዔቁ ያኦሲም ዚጌሂያ ጉሙርቁሂናኩ።

22 ዮሴፔ ሃሃ ሃይቃኒ ዑካዎ ዒሰራዔኤሌ ዓሶም ዔያታ ጊብፄ ዓጮይዳፓ ኬሰካንዳያ ማዒያ ኬኤዜሂ ሃሃ ዒዛኮ ሜጌያ ዔያታ ዎዳንዳቴያ ዓይሂሂ ጉሙርቁሂናኩ።

23 ሙሴ ሸዔ ዓሳ ዒ ሸይንቴ ወደና ማዘጲ ናይ ማዔሂ ዛጋዎ፣ ካኣቴ ዓይሂ ዓይሂያ ዒጊጩዎዎ ሃይሃ ዓጊኒ ዒዛ ዓኣቼሂ ጉሙርቁሂናኩ።

24 ሙሴ ዒማና ዲጩሂኮ ጊንፃ፡- «ጊብፄ ዓጮ ካኣቴኮ ናዎ ናኣዚ» ጌይንቴ ዔኤሊንቲያ ዒይሂ ጉሙርቁሂናኩ። 25 ዒዚ ዳካ ዎዳሮ ጎሜ ማዲ ማዲ ዴንቆ ዎዘይዳፓ ባሽ ያኦሲ ዴሮና ዎላ ሜቶ ዔካኒ ኮዔ። 26 ሃጊ ዒዛም ዒንጊንታንዳ ባኮ ዒ ዔሬሂሮ ጊብፄ ዓጮ ቆሎይዳፓ ባሽ ሜሲሄ ዛሎሮ ቦሂንቲፃ ባሽ ቆሎ ማዔሂ ዒ ዛጌ።

27 ዒዚ ሃሃ ካኣቴኮ ጎሪንቶ ዒጊጩዎዎ ጊብፄ ዓጮይዳፓ ኬሰኩሂ ጉሙርቁሂናኩ፤ ጴዳዎ ያኦዛሂ ዴንቁያ ማሂ፣ ዒ ፔ ማሊያና ደዴ። 28 ቶይዶ ናኦቶ ዎዳንዳጉዲ ዒማና ዓይሂንቴ ኪኢታንቻሂ ዒሰራዔኤሌ ዓሶኮ ቶይዶ ናኦቶ ዎዲዎጉዲ ዑሃ ዓኣዲያ ዎጎና ካሮ ዑፃ ሱጉያ ፑጩያ ዎጎዎ ዒ ኩንሂሂ ጉሙርቁሂናኩ።

11:17 11:17 ማኸ. ማፃ 22:1-14። 11:18 11:18 ማኸ. ማፃ 21:12።
11:20 11:20 ማኸ. ማፃ 27:27-29፤39-40። 11:21 11:21 ማኸ. ማፃ 47:31—48:20። 11:22 11:22 ማኸ. ማፃ 50:24-25፤ ኬሲ. ማፃ 13:19።
11:23 11:23 ኬሲ. ማፃ 2:2፤ 1:22። 11:24 11:24 ኬሲ. ማፃ 2:10-12።
11:27 11:27 ኬሲ. ማፃ 2:15። 11:28 11:28 ኬሲ. ማፃ 12:21-30።

29 ዒስራዔኤል ናኣታ ፃኣዲ ሰዓይዳ ሃንቶጉዲ ሃንቲ ዞቁ ባዘና ፒንቁሂ ጉሙርቁሂናኩ፤ ገብፄ ዓሳ ጋዓንቲ ዔያቶጉዲ ፒንቃኒ ማሌ ዎደና ቢያሂ ዎኣፆና ሙይንቴኔ።

30 ዒስራዔኤል ዓሳ ዒያርኮ ካታሞኮ ሹጮና ኬልቂ ዲርቆና ዲር ዙሎ ላንካይ ኬሊ ሸሬሂኮ ገንፃ ዬያ ዲር ዔያታ ደይሴሂ ጉሙርቁሂናኩ። 31 ዞኣዛ ኮኣማ፡ ሬዓባ ጎዎዛ ዒስራዔኤል ይዳፓ ሙር ሙኬ ዓሶ ሸኣቺንሂ ዔኪፆና ፆኦሲም ዓይሂንቲዎ ዓሶና ዎላ ሃይቁዎዎ ዓቴሂ ጉሙርቁሂናኩ።

32 ዓካሪ ዬካፓ ዑሣ ታ ዎዚ ጎዎንደይ! ጌዲዮኔ፡ ባርቄ፡ ሶምሶማ፡ ዮፕታኣሄ፡ ዳውቴ፡ ሰሙዔኤሌንታ ፆኦሲ ማሊፆ ኬኤዛ ዓሶንታ ዛሎ ታ ኬኤዚ ጋፒሳኒ ዳንዳዑቀሴ። 33 ዔያታ ጉሙርቁሂና ካኣቶ ፆልዚና ባሼኔ፡ ፒዜ ዎጊሂና ዓሶ ዎይሄኔ፡ ፆኦሲ ዔያቶም ዒንጌ ሃጊ ማዓንዳ ዎዞ ባኮዎ ዴንቄኔ፡ ዘሶኮዎ ዳንጎ ዓይሄኔ፤ 34 ታሚ ዎልቄያ ባሼኔ፡ ጩንቾ ዓፓርና ሃይቁፆይፊፓ ቶሌኔ፡ ላቢፃፓ ደዴኔ፡ ፆልዚና ዔርቴያ ማዔኔ፡ ዔያቶ ፆላኒ ሙኬ ሞርኮኮ ፖኦሊሶ ዳውሴኔ፤ 35 ላኣላ ፔኤኮ ሃይቁ ዒጊኖ ሃይባፓ ዔቁም ዴንቄኔ። ማሌ ዓሳ ሃይቢፓ ዔቁ ባሼ ናንጊ ዴንቃንዳኔ ገዒ ዲማ ዲማ ማቶ ዔኬኔ፤ ዬያይዳፓ ቶሊ ማታ ባኣያ ናንጋኒያ ኮይባኣሴ። 36 ፔቴ ፔቴ ዓሳ ዓሲኮ ዓማሊ ማዒ ዢራፓና ጳርቁንቴኔ፤ ሃንጎዎታ ሃሣ ዓንጊ ዲፆና ቴኡቲ ቴኡሲ ማኣሪ ጌሌኔ፤ 37 ሹቺናኣ ዲይንቴኔ፡ ማጋኣዜ ጌይንታ ዓንጎና ሄኮ ጳሊንቴኔ፡ ጩንቾ ዓፓርናኣ ጫርገንቲ ሃይቄኔ፡ ማራይና ዎኣሪናኮ ዒልዒ ማይንቲ ማታዲ ሃንቴኔ፡ ማንቆ ሃሣ ቤሲባኣ ዓሲያ ማዒ ሃንቴኔ፤ 38 ዓሲ ናንጉዎ ዳውሎይዳ፡ ዲኮይዳ ሃሣ ዴኔ ዔቴንታ ዛሬንታይዳ ዎርቂ ዎርቂ ሃንቴኔ፤ ዬያር ዓጫ ዔያቶም ኮይሳ ቤሲ ማዒ ጴዲባኣሴ።

39 ዬያታ ቢያ ፔ ጉሙርቁፆና ማርካዲንቴያታቴያ ዔያቶም ዒንገንቴሃጊ ማዔ ዎዞ ጋዓንቲ ዔያቶይዳ ዴንቁይ ባኣሴ። 40 ፆኦሲ ኑም ዑሣ ዓኣዴ ኮሺ ማዔ ባኣዚ ገኢጊሺሂር ዔያታ ኑኡና ዎላ ማዓንዳኣፓዓቴም ዔያቶና ሌሊ ፆኦሲ ማሊፆ ኩማያቲዎሴ።

11:29 11:29 ኬሲ. ማፃ 14:21-31። 11:30 11:30 ዒያ. 6:12-21።
11:31 11:31 ዒያ. 2:1-21፤ 6:22-25። 11:32 11:32 ሱኡጎ. ማፃ
6:11—8:32፤ 4:6—5:31፤ 13:2—16:31፤ 11:1—12:7፤ 1ጎሙ. 1:1—1ካኣቶ. ማ
2:11። 11:33 11:33 ዳኣኔ. 6:1-27። 11:34 11:34 ዳኣኔ. 3:1-30።
11:35 11:35 1ካኣቶ. ማ 17:17-24፤ 2ካኣቶ. ማ 4:25-37። 11:36 11:36
1ካኣቶ. ማ 22:26-27፤ 2ፆኦሲ. ዓሃኬ 18:25-26፤ ዔር. 20:2፤ 37:15፤ 38:6።
11:37 11:37 2ፆኦሲ. ዓሃኬ 24:21።

12

ጾኑሲ ኑኡኮ ዓድ ማዒያ

1 ዬያጉዴ ሻኣሬ ማዔ፥ ማርጌ ማርካ ኑኡኮ ዓኣሢሮ ኑኡኢያ ከዲ ኑም ማዔ ባኮ ቢያ፤ ሃሃ ኑና ቱኪ ዓርቄ ጎሞይዳፓ ዲማዲ ኑኡኮ ቤርታ ዓኣ ጳኮ፣ ጊቢ ዲንዳዒሢና ደዲ ኑ ጳሽኮም። 2 ኑ ጳሽካንዳሢያ፡- ኑኡኮ ጉሙርቂጾኮ ካራ ማዔሢና ኩንሃያ ማዔ፥ ዬሱሴ ዛጊኬ፤ ሃጊ ዒ ዴንቃንዳ ዎዘሮ ፑርቶ ዓሶ ሱፆ ማጾይዳ ዓኣ ዲውሲንቶ ሃይቦ ዔኤቢ ማሂ ዛጉዎጾ ሃሃ ዒኢካ ዒ ሃይቄ ሃይቦና ማታሢና ጉቤ ዲንዳዒ ጾኑሲኮ ካኣቱሞ ጾይቶ ኬሰኪ፥ ዒዛኮ ማዘቆ ዛላ ቦንቾና ዴዔ።

3 ዓካሪ ዒንሢ ጾኣዛዲዎያ ሃሃ ሃጊ ማዓንዳ ዎዘባኣ ዓሲጉዲያ ማዒፖቱ፤ ጋዓንቱ ዬያ ቢያ ጎሞ ዓሳ ዒዛ ዒዳ ማዴ ባኮ ጊቢ ዲንዳዔ፥ ዬሱሴ ዛጉዎቱ። 4 ዒንሢ ጎሞ ዒዳ፥ ሃይቢ ሄላንዳኣና ማሹሞቦ ዓርቂባኣሴ። 5 ጾኑሲ ዒንሢ ፔኤኮ ናኣቶ ማሂ፡- «ታ ናዓሢዮ! ጎዳ ጎራ ጎሮ ቦሂፖ፤

ዒ ኔና ማቶና ጎራ ዎደና ሃጋኣ ዎዛ ባኣያ ማዒፖ፤

6 ዓይጎሮ ጌዔቱ፡- ጎዳ ፔ ናሽካሢ ጎራ፤፤

ፔ ናይ ማሂ ዛጋሢያ ዒ ፀንቃ።»

ጌዒ ዛሬ ዘሮ ዒንሢ ዎሌኔ። 7 ጾኑሲ ዒንሢ ፔኤኮ ናይ ማሂ ዛጋሢሮ ዒዚ ማቶና ዒንሢ ጎራ ዎደና ጊቢ ዲንዳዒዐቱ፤ ዓዴ ጎሪ ጳርቂዎ ናይ ዓኣ? 8 ናኣቶ ማዔዘንሢ ዔካ ማታሢ ዒንሢ ዔኩዎያ ማዔቱ ዓሌ ናይ ዒንሢ ማዓንዳኣፓዓቱም ሾዎና ናይቱዎሴ። 9 ዬይ ዓታዛ ኑና ቢያሢ ጎሪ ፀንቃ፥ ኑና ሾዔ ዓድንሢ ዓኣ፤ ያዲ ማዔቱያ ኑ ዔያቶ ቦንቻ። ዓካሪ ሹምፖና ናንጋኒ ኑኡኮ ዓያኖ ዓዳሢም ባሽ ዓይሢንታንዳያ ኑም ኮይሱዎዓዳ? 10 ኑ ዓድንሢ ዔያቶም ኮሽ ማዒ ዴዴ ጎይፆ ዳካ ዎዴም ኑና ጎሪ ፀንቃ፤ ጾኑሲ ጋዓንቱ ዒዛና ዎላ ኑ ጌኤሽ ማዓንዳጉዲ፥ ኑና ማኣዳ ባኣዚሮ ማቶና ኑና ፀንቃ። 11 ጎሪ ፀንቆ ፀንቃ ቢያ ዒማና ጾዩሳያኬ፥ ዎዘሳያቱዎሴ፤ ጊንፃፓ ጋዓንቱ ጊቢ ዲንዳዒ ዔሬ ዓሶም ኮሹሞ ኩሜ፥ ዒሉሞ ናንጊ ዴዲሻ።

ዘሮና ላቲሢና

12 ዬያሮ ዒንሢ ዓያኖ ዛሎና ላቤ ላቢፃፓ ደዲዎቱ። 13 ዎቦ ማዔሢ ዳቂ ፒዛንዳጉዲ ማዓንዳኣፓዓቱም ፔቶ ዛኣሉዎጉዲ ዒኖ ዒንሢኮ ፒዜ ጎይሢ ዔኪ ዓኣዲዎቱ።

12:6 12:6 ዓ.ዮ. 5:17፤ ኮኣኪ. 3:11-12። 12:12 12:12 ዒ.ሲ. 35:3።
12:13 12:13 ኮኣኪ. 4:26።

14 ዓሲ ቢያና ኮሺ ናንጋኒ ማሉዋቲ፤ ያኦሲም ዲማዲያ ማዓኒያ ደዲዋቲ፤ ዓይጎር ጌዔቲ ያኦሲም ዲማዲባኦ ያኦኒያ ዒዛ ዛጋኒ ዳንዳዑዋኣሢሮኬ። 15 ዒንሢዳፓ ያጊዳኣ ያኦሲ ኮሹሞና ዒንጋ ዒንጊፃ ፓጩ ጴዲዋጉዲ ዒንሢና ዔሩዋቲ፤ ዬያጉዲ ሃሃ ዓይጎ ዓሲያ ዒንሢ ባኣካ ጫንቃ ሚሢጉዲ ማዒ ኬሰኪ ዒንሢ ሚታሱዋጉዲና ሚርጌሢ ፑርቲሱዋጉዲ ዒንሢና ዔሩዋቲ።

16 ዒንሢ ባኣካ ፔቴና ሙዖ ሙኡዚር ጌዒ ቶይዲሞ ሻንቼ፡ ዔኤሳዎጉዲ ደቢንታያ ሃሃ ጊንሣ ያኦሲ ቦንቸሱዋያ ማዔ ዓሲ ጴዲዋጉዲ ዒንሢና ዔሩዋቲ። 17 ጊንፃፓ ዔኤሳዎ ዓንጆ ዔካኒ ኮዔ ዋደና ዓንጆ ዒዚ ላኣጊንቲሢ ዒንሢ ዔራኔ፤ ዋዚ ዒ ዬኤኪ ዬኤኪ ዬዮ ዓንጆ ደዲ ኮዔቲያ ዴንቃኒ ዒ ዳንዳዒባኣሲ፤ ዓይጎር ጌዔቲ ዒ ቤርታ ደቤ ደቢንቶ ቡኡዖንዶ ካራ ዒዛም ጴዲባኣሢሮኬ።

18 ዒንሢ ኩቻ ዓርቂንታኒ ዳንዳዑዋያ ሃሃ ጊንሣ ታማ ዔኤታ ሲና ዲኮ ሄለባኣሲ፤ ጌይፃ፡- ቃኣያሢ ቤዞ፡ ዲሞ ቤዞ፡ ዓልጋሢ ዔቁ ቤዞ፡ 19 ዛዮ ዑኡዛ ጊንሣ ሃሃ ጌይንታ ባካ ዋይዚንታ ዑኡዛ ዓኣ ቤዞ ባንሢ ዒንሢ ሄለባኣሲ፤ ዬያ ባኮ ዋይዜ ዓሳ፡- «ሃይፓ ሴካ ማሌ ባኣዚ ኑም ኬኤዚንቶፓ» ጌይ ሺኢቄኔ።

20 ዓይጎር ጌዔቲ፡- «ዲኮ ቆልሞ ሄሌቲታዖ ሹቸና ዲይንቲ ሃይቆንጎ» ጋዓ ዓይሢዖ ዔያቶም ዴኤፃሢር ዔካኒ ዔያታ ዳንዳዒባኣሢሮኬ።

21 ዬካ ጴዳ ባካ ሚርጌ ዒጊቻያ ማዔሢር ሙሴታዖ «ታ ዒጊጩ፡ ጎጋይቄኔ» ጌዔኔ።

22 ዒንሢ ጋዓንቲ ጂዮኔ ዲኮ ባንሢ ሙኬኔ፤ ዬይያ፡- ባይቁዎ ያኦዛሢ ካታሞ ማዔ፡ ጫሪንጮ ዬሩሳላሜኬ፤ ዒኢካ ዋዛና ቡኩንቲ፡ ፓይዲንቲዋ ዲቦ ኪኢታንቸ ባንሢ ዒንሢ ሙኬኔ። 23 ሃሃ ሱንፃ ዔያቶኮ ጫሪንጮይዳ ፃኣፒንቲ፡ ኪሪሰቶሴ ጉሙርቃ ሺኢጲዖ ማኣር ዓሶኮ ቶይዶ ማዔ፡ ኪሪሰቶሴ ጉሙርቃ ዓሶ ቡኩንቶ ባንሢ ጊንሣ ሃሃ ቢያሢም ዋጋያ ማዔ፡ ያኦዛሢና ያኦሲ ዔያቶ ማዖም ጌዔ ጎይዖ ማዔ፡ ኩዢ ዓሶ ዓያኖና ባንሢ ዒንሢ ሙኬኔ፤ 24 ሃሃ ያኦሲና ዓሲናኮ ባኣካ ዓኣ ዓኮ ጫኣቁሞ ጊኢጊሺ።

12:15 12:15 ላሚ. ዋማ 29:19። 12:16 12:16 ማዢ. ማፃ 25:29-34።
12:17 12:17 ማዢ. ማፃ 27:30-40። 12:19 12:19 ኬሲ. ማፃ 19:16-22፤
20:18-21፤ ላሚ. ዋማ 4:11-12፤ 5:22-27። 12:20 12:20 ኬሲ. ማፃ 19:12-13።
12:21 12:21 ላሚ. ዋማ 9:19።

ዩሱሴ ባንሢ፤ ዩያጉዲ ሃሣ ዓኣቤኤሌ ሱጉፃገ ባሽ ኬኤዛ፡ ጎሜ ጌኤሻኒ ፑጩንቴ ዒዛዞ ሱጉፃ ባንሢ ዒንሢ ሙኬኔ።

25 ዩያ ኬኤዛ ባኮ ዒንሢ ዒፀዋጉዲ ዒንሢና ዔሩዋቴ፤ ዓይጎር ጌዔቴ ዩያታ ሳዓገ ዔያቶም ኬኤዛ ዎደና ዒፃ ዔያታ ቶሊ ዓቲባኣያ ማዔቴ፡ ጫሪንጫገ ኑም ኬኤዛሢዳገ ኑ ሃኬቴ ዎይቴ ኑ ቶላንዳይ!

26 ዓመና ዒዛዞ ዑኡዛ ሳዎ ዓገሢኔ፤ ሃሢ ጋዓንቴ፡- «ሳዎ ሌሊቱዋንቴ ፔቴና ላሚ ጫሪንጫንታ ዎላ ታ ዓገሢንዳኔ» ጌዒ ጫኣቄኔ። 27 ዩይ «ፔቴና ላሚ» ጌይንቴ ባካ ዔርዘሢ ዓገፀዋ ባካ ደዲ ናንጋንዳጉዲ ሃሣ ዓገፃያ ማዔ፡ ማዢንቴ ባካ ባይቃንዳያ ማዔሢኬ።

28 ዓካሪ ኑኡን ዓገፀዋ ቤዛ፡ ያኦሲ ዎይሣሢዳ ጌላንዳሢር ዒዛ ኑ ጋላቶም፤ ሃሣ ዒ ዎዛዳ ጎይሢ ዒዛ ቦንቺሢና ዒገጩሢና ዒዛ ኑ ካኣሽኮም። 29 ዓይጎር ጌዔቴ ኑ ያኦዛሢ ሚቺ ባይዛ ታሚ ማዔሢርኬ።

13

ያኦሲ ዎዛሳ ጎይሢ

1 ቢያ ዎዴ ዎሊኮ ጌርሲ ሃሣ ጌርጉዲ ናሽኪንቱዋቴ፤ 2 ሸኦቺ ሸኦቺንሢ ዔኪሢ ዎሊፖቴ፤ ዓይጎር ጌዔቴ ዩያጉዲ ሸኦቺ ሸኦቺንሢ ዓሳ ዔሩዋዎ ያኦሲ ኪኢታንቸ ሸኦቺንሢ ዔኬኔ። 3 ቱኡዞ ማኦራ ቱኡቴ ዓሶና ዎላ ዒንሢያ ቱኡቴ ዓሲ ማዒ ዔያቶም ማሉዋቴ፤ ሃሣ ዔያቶና ዎላ ሜታዳያ ማዒ ሜታሢዳ ዓኣ ዓሶም ማሉዋቴ።

4 ላኣሊ ዔኪ ዎላ ናንጎ ናንጎ ቢያሢ ቦንቻያ ማዎንጎ፤ ዓኒና ማቸና ዎሊ ጉሙርቁዎያ ማዒ፡ ዎሊ ዔኪ ናንጎ ናንጎ ዒኢሶገ፤ ዓይጎር ጌዔቴ ያኦሲ ዘኣሰካ ኮኦማ ፑርቶ ሱኡኮና ዓኣ ዓሶንታ ዓኒ ሃሣ ማቸ ማዒባኣ ዓሶና ላሃ ዓሶዋ ፑርታና ዎጋንዳሢርኬ።

5 ሚኢሼ ፔቶ ናሽኪሢ ሃሹዋቴ፤ ዒንሢኮ ዓኣ ባኮና ዎዛዲ ናንጉዋቴ፤ ዓይጎር ጌዔቴ ያኦሲ፡-

«ማሊ ታ ኔና ኬኤራዓኬ፤ ሃሻዓኬ» ጌዔኔ።

6 ዩያር ጉሙርቁ፡-

«ጎዳ ታና ማኣዳሢኬ፡ ታ ዒገጫዓ፤

ዓሲ ታና ዓይጎ ዎኦታንዳይ?» ኑ ጋዓኔ።

12:24 12:24 ማዢ. ማፃ 4:10። 12:25 12:25 ኬሲ. ማፃ 20:22። 12:26 12:26 ሃኣኔ 2:6። 12:29 12:29 ላሚ. ዎማ 4:24። 13:2 13:2 ማዢ. ማፃ 18:1-8፤ 19:1-3። 13:5 13:5 ላሚ. ዎማ 31:6፤ 8፤ ዒያ. 1:5። 13:6 13:6 ዓይኑ. 118:6።

7 ቤርታ ዒንሢም ያኑሲ ቃኦሎ ከኤዜ፣ ዓርና ማዔ ዓሶ ሞሊፖቴ፤ ዔያቶኮ ናንጎና ዔያታ ማዳ ማዳኮ ዓኣፖ ጳቂሢ ሃሃ ዔያታ ጉሙርቁ ጎይያ ጉሙርቁዋቴ። 8 ዩሱስ ኪሪሰቶሴ ዘጊኖ ሃኖ ሃጋ ናንጊና ዓኣ ጎይያማኬ፤ ላኣሚንቱዋሴ። 9 ዲማ ዲማ ዔርቲባኣ ዔርዘ ዔርዘሢሢና ዲዒንቲ ዔውቲፖቴ፤ ዒና ኑኡኮ ሙኡዚ ደምቤ ካፕሢናቱዋንቲ ያኑሲ ኮሹሞና ዒንጌ ዒንጊያና ደዴቲ ቃራኬ፤ ዓይጎር ጌዔቴ ዬያ ሙያ ዳምቦ ካፕ ዓሶ ዬይ ዓይጎዋ ማኣዲባኣሢረኬ።

10 ኑኡኮ ያኑሲም ዒንጎ ባኮ ሺኢሾ ቤሲ ዓኣኔ፤ ጋዓንቲ ዓፒሎና ማዢንቲ ማኣርኮ ጋርይዳ ማዳ ቁኤሳ ዬኖ ያኑሲም ዒንጎ ቤዘይዳ ዓኣ ሙያ ዔኪ ሙዓንዳጉዲ ዓይሢንቲባኣሴ። 11 ዓይሁደ ዓሶ ቁኤሶኮ ዑዓሢ ጎሜ ጌኤሻ፣ ቆልሞ ሱጉያ ዔኪ ያኑሲም ዑሣ ዓኣዴ ዲማዴ ቤዜሎ ጌላኔ፤ ቆልሞኮ ዓሽካ ጋዓንቲ ጉርደ ዙላ ኬሲ ሚቸንታኔ። 12 ዬያጉዲ ዩሱሴ ዴርኮ ፔ ሱጉያና ጎሞ ጌኤሻኒ ካታሞኮ ዙላ ሃይቦ ሜታሢ ዔኬኔ። 13 ዬያር ኑኡኒ ጉርዳፓ ዙሎ ኬሰከ፣ ዒዛ ባንሢ ዴንደም፤ ዒዛና ዋላ ቦሂንቲ፣ ቦሂንቲያ ኑዋ ዔካያ ማዖም። 14 ዓይጎር ጌዔቴ ኑ ሃጊ ሙካ ካታሞ ካፓኣፓዓቲም ሃይካ ሳዓ ባይቁዋዖ ደዲ ናንጋ ካታማ ኑኡኮ ባኣሴ። 15 ዓካሪ ዩሱስ ኪሪሰቶሴ ዛሎና ጋላታ ያኑሲም ዒንጎ ባኣዚ ማሂ ቢያ ዋዴ ኑ ዒዛም ዒንጎም፤ ዬይያ ዒዛ ሱንያ ዛሎ ኑ ዳንጎና ኑ ማርካዳ ጋላቶኬ። 16 ሃሣ ኮሺ ባኣዚ ማዲሢና ዒንሢኮ ዓኣ ባኮ ሜሌ ዓሶም ጊሽኪ ዒንጊሢ ሞሊፖቴ፤ ዓይጎር ጌዔቴ ያኑሲ ዋዛሳ ዒንጊያ ዬያጉዴ ዒንጊያ ማዔሢረኬ።

17 ዒንሢኮ ዓርኖ ማዔ ዓሶም ዓይሢንቲ፣ ዔያቶም ዋርቃያ ማዑዋቴ፤ ዓይጎር ጌዔቴ ዔያታ ማዳ ማዳ ዛሎ ሚርጌና ዔያታ ያኑጨንታንዳያ ማዔሢረ ዒንሢ ሹምፖ ዛሎ ቢያ ዋዴ ዔያታ ደዲ ማዳኔ፤ ዒንሢ ዔያቶም ዓይሢንታያ ማዔቴ ዔያታ ፔኤኮ ማዳ ዋዛና ማዳንዳኔ። ያዲ ማዒባኣያታቴ ማዳ ዔያቶኮ ያዩሢና ማዓንዳኔ፤ ዬይ ዒንሢም ጌኢጋዓኬ።

18 ኑም ሺኢቁዋቴ፤ ቢያ ጎይሢና ኮሺ ናንጊ ናንጋኒ ኮዓ፣ ጌኤሺ ማለሢ ኑኡኮ ዓኣሢ ኑ ዔራኔ። 19 ባሺ ደዲ ዒንሢ ሺኢቃንዳጉዲ ታ ጋዓሢ ዑኩና ዒንሢ ኮይላ ታ ማዒ ሙካንዳጉዲኬ።

ጋፒንሢ ሺኢጳሢ

20 ናንጊና ናንጎ ጫኣቁሞ ሱጉያና ማራቶኮ ዴኤፒ ሄንቃያ ማዔ ኑ ጎዳሢ ዩሱሴ ሃይባፓ ዔቂሴ ኮሹሞኮ ያኣዛሢ፣ 21 ዒዛ ማለያ

13:11 13:11 ለዋ. ዓኬ 16:27።

ኩንሣያ ዒንሢ ማዓንዳጉዲ ኮሺ ባኣዚ ማዳያ ዒንሢ ማሆንጎ፤ ሃሣ ዒዛ ዎዛሳ ባኣዚ ዬሱሰ ኪሪሰቶሴ ዛሎና ዒ ኑ ጊዳ ማዳንጎ፤ ዬሱሰ ኪሪሰቶሴም ናንጊና ቦንቾ ማዎንጎ፤ ዓኣሜን።

ጋፒንሢ ሃይሴ

22 ታ ዒሾንሦ! ታ ሚሾንሦ! ሃይ ታ ዒንሢም ፃኣፔ ኪኢታ ዳካ ማዔሢሮ ሃያ ታኣኮ ዘሮ ሃይሶ ጊቢ ዳንዳዒ ዒንሢ ዔካንዳጉዲ ታ ዒንሢ ሺኢቃኔ። 23 ኑ ዒሻሢ፣ ፃሞቴዎሴ ቴኡዘ ማኣራፓ ቡሊንቴሢ ዒንሢ ዔራንዳጉዲ ታ ከዓኔ፤ ሃሢ ዑኩና ዒ ሃይካ ሙኩቶ ዒዛና ዎላ ሙኪ ታ ዒንሢ ዛጋንዳኔ።

24 ዒንሢኮ ዓርኖና ጾኦሲም ዲማዳ ዓሶናም ቢያ «ኮሺዳ?» ጋዓኔ፣ ጎዑዎቴ። ዒፃሊያ ዓጮይዳፓ ሙኪ፣ ታኣና ዎላ ዓኣ ኪሪሰቶሴ ጉሙርቃ ዓሳ «ኮሺዳ?» ዒንሢ ጋዓኔ።

25 ጾኦሲኮ ኮሹሞ ዒንጊፃ ዒንሢ ቢያሢና ዎላ ማዎንጎ።

ጌሌዥ ማግኔግ
The Holy Bible in the Maale language of Ethiopia,
using Ethiopic script

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዥ ማግኔግ

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-13

PDF generated using Haiola and XeLaTeX on 21 Feb 2024 from source files dated 14 Apr 2023

bbcfb90a-3ae3-5452-983d-6c4c02375929